

摘藻堂四庫全書薈要

集部

欽定四庫全書薈要卷一萬九千四百四十一

集部

皇清文頴卷四十

賦

璿璣玉衡賦

有序

葉方藹

夫乾苞闡祕襲氣母於羲皇神策迎長占斗綱於  
軒后南正司天之載五緯同躔東隅迓日之年四  
時成歲乃肇渾天之制爰垂歷象之名邈矣悠哉  
曷乎尚矣若其靈承帝眷敬授民時基命夙夜之

心效法聰明之德先聖後聖其揆一也我

皇上凝休紫極昭受璇穹上治而協健行下交以成泰  
運珍符霧集聚房會井之精景貺雲臻合璧編珠  
之瑞猶且單心不懈奉若加虔推玉律以調八風  
授靈臺而占五候星球乍啓不踰分至之司圭表  
初懸無爽陰陽之景緹宮吹管即應黃鐘嶰谷鳴  
簫奚煩黑黍此惟清寧同撰日月合明故仰昊瞻  
天久在淵衷已裕勅幾觀象不越反躬而求矣若

稽勲華之代首崇平秩之規是有璣衡用資測驗  
以之考憲而七政攸齊以之亮工而五辰斯撫固  
稱隆於曩昔實合契於今茲敢竭疎庸敬陳斯賦  
天德健行

聖躬時憲懸象昭回泰階巍煥並明照以升恒握神機  
而清晏攬貞觀之同符美勲華之再見審歷象之儀型  
考璣衡之舊撰爾其乾文中列坤質外包機緘畢設網  
紐斜交既轄之以圓軸又筦之以橫簫飾蠙珠之的皪



琢崑玉之英瑤輸激水以自運旋靈樞而不撓三重之儀而六合莫之外一寸之管而萬象不能淆其為體也規如彈丸其為用也捷如轉圜其為象也三百六十有五度之廣其為數也一百七萬一千里之寬黃道赤道界其內南極北極持其端日月迴環於其際星辰縈帶於其間東游而蒼龍晨駕西游而玉露宵溥景長而朱曦送燠景短而清風戒寒辨早晚之異候察盈縮之殊觀雖渾涵於一氣實森布於周垣智非同於窺牖情寧

等於扣槃彼夫洛下初摹鮮于爰度測靈憲於張衡營  
銅儀於錢樂承天淳風之改造一行郭公之制作莫不  
研渺慮於毫釐覃巧思於冥漠法加密於前人理終資  
於先覺縱能析夫天象之至微猶未喻乎

聖心之所託也蓋璿璣之所紀者名玉衡之所窺者形  
形非道之妙名非理之精道則剛健而中正理則元亨  
而利貞是天體之所以宰乎化育而至德之所以合乎  
穆清故乃上瞻峻極仰則高明旁規二曜疏觀列星占

以五事驗以庶徵以言乎日太陽之精純離之質聖人  
法之以施剛德負丹扆以答陽臨彤軒而辨色洞萬物  
於幽遐統羣工而祖識煥昭明乎四方布暉光於九域  
以言乎月內政之修陰教之協聖人法之以安柔節循  
晏晦以有時慎糾虔而罔忒致少采以修刑謹後宮而  
辨列起風化於闕雎絕燕私於女謁至夫五緯行天日  
月之餘彼遲留而伏匿即消息與盈虛雖疾徐之各異  
及次舍之懸殊要觀祲而禳災必修德以臨諸惟歲星

之為木主東方之甲乙年浹辰而一終揆進退而罕失  
適春陽之始舒聿體仁而播德發倉廩以振乏絕飭田  
事而定準直睇東作以覘土膏待下流而承大澤熒惑  
司火其日丙丁周天行以二載主夏令之暢盈乃有遂  
良贊俊之典勞民勸相之行斷薄青而出輕繫嗜欲靜  
而晏陰成養壯佼以順時定心氣而永寧若填星之位  
乎中央其日戊己而寄王乎季久居之國福厚薄焉者  
反是所以統四時而合度總五行而成位會陰陽風雨

之和收稼穡作甘之利節火耕水耨之勤紓金毀木飢之弊爰有太白之曜庚辛是主歲一周天附日而處惟金行之秋令肅天地於區宇詰暴而來遠方勅法而繕圉圉建都邑以備圉倉易關市以柔商旅辰星水德壬癸司衡環陽麗日至陰之精乃迎寒於北郊時閉塞而冬成爰恤羽林之孤寡審龜筮之吉凶命百官而眡蓋藏考工師而按度程是曰三辰亦名七政惟在下者召其和乃在上者彰其應匪天心之偶違從實人事之多

逆順皇皇乎不聞亦式穆穆乎非言而令必敬凜夫旦  
明若儼承其提命斯軌順而階平庶璣明而衡正為象  
緯之貞符昭皇王之景運非甘石之能窺詎羲和之足  
問緊我

上聖端拱垂旒倣天體之廣覆嚮明堂而燭幽喜怒哀形  
乎寒燠刑賞協乎春秋貌言視聽以咸飭工虞水火之  
交修肖乾坤易簡之易演皇極斂錫之疇是故天不愛  
夫寶道神永獻以嘉庥德有動而必叶感無美而勿道

定永年之厯數荷帝錫之共球眺榮光於德水產蓂莢  
於

皇州受昭華龍叙之器賡卿雲復旦之謳媿陶唐之茂  
烈方虞后之徽猷又何假乎玉儀銅渾之製與夫保章  
馮相之儔

璿璣玉衡賦

張玉書

仰乾象之昭融周寰宇而默運成歲功於靈樞燭人事  
以垂訓遐覽古初陰陽軌順五精呈符三光朗潤誕受  
圖於滎河爰協筭於時令嗣在高陽八風叶應載洎帝  
嚳五官司正中星辨於伊耆七曜齊於帝舜於稽虞制  
曰璣曰衡璣設象以環映衡窺機而中橫睠密緯之粲  
列雖銖黍之畢程飾夜光以測度既規圓而體精琢良  
玉以為管亦外澤而中瑩古厯云亡星官失術越有渾



儀是纂是述準尺寸以經營傳璣衡之髣髴其為體也  
六合外圍辰游內設指二軸以直距燭低昂於毫末其  
為用也分天脊以立極跨地平而定隅指南北之兩端  
激機輪如轉樞若夫日躔黃道與赤為界半入其中半  
出其外晷長至而牽牛是經景短至而東井斯在辨婁  
角於春秋實二分之交會此日行之軌陽舒而陰殺者  
也月行九道黃道則一周列四維隨方易色經其南為  
朱經其西為白經其東為青經其北為黑分內外而錯居

并中道為九則此月行之軌陽消而陰息者也至於驗五緯之凌歷分贏縮於步躔惟金水之附日常一歲而周天火再歲而秉令木一終而司權填中央以主福閱二十八歲而一遷其間順逆留伏循環無端伏行最急留行則延順歷而東行則合逆軌而西行則偏此五星之度有常道亦有變愆者也大抵日月之行以天為輻星緯之道以日為轂天左旋而常贏日麗天而差縮天視日為有餘日規天為不足積經歲以為期斯日會天

而來復繫太陰之行緩按躔次而可推計一日之所退  
常十三度而有奇月一周而交會實日速而月遲惟星  
官之步歷謂進度為難稽指逆數以握算若右旋其易  
窺倘折衷於至當實左旋其不移夫天度有常觀象斯  
在天命難諶惟德克配昔者聖人之答幽明序五行也  
晝考乎日氣協純陽象以修政積精於剛垂離照於庶  
事振遐覽於八荒夕考乎月體含純陰象以修德退密  
洗心既內庭之式序亦宵衣之是箴爾乃啟春令於東

陸屬重華而為木溥仁澤以噓枯配青陽之覆育秩夏  
令於南訛屬熒惑而為火敷禮教以牖民範羣蒙之偏  
頗涼風既至太白司金象秋令以義正肆賞善而罰淫  
嚴霜乍隕辰星司水象冬令以智臨爰植綱而置紀令  
行季夏中德為土四星迭運填不易矩堅大信如金石  
捷令甲於風雨於是乎有治溝洫設瀦防疏川谷謹關  
梁之水政有司烜燿頒禁律改國火救時疾之火政有  
戢淫邪嚴五刑誅暴慢厲五兵之金政有掌薪蒸禁林

麓司器用慎儲蓄之木政有辨物產課樹藝定土圭度  
地勢之土政凡以觀文察變協序撫辰或灾沴之偶告  
即修救以薦馨雖禮詳於三代實道啓於虞廷觀於命  
九官分庶職倣天工協羣力罔非察惠逆於神人相璣  
衡而因革此所謂欽若之淵源歷千聖而同德也天祚  
聖皇丕膺休命衍箕疇行夏正格神明盡物性握苞符  
以建極召箕畢而環應惟

睿慮之璣衡不假器而垂鏡於時天門肅穆泰階清平

儼衆星環共而仰紫極之威神焉百職受成四海陶冶  
譬二十八宿之森列而司九州之分野焉朝視政以勤  
民夜考經而省憲兩曜之旁矚無垠而宰之以至健也  
軫旱潦以渙號宣幽滯而達情五緯之代更遞旺而總  
之以好生也繼自今以協氣旁流嘉生蕃殖大澤沾濡  
聲靈允塞固不必連珠合璧之祥五福庶徵之集然後  
知邛隆臻於三五而天人接於呼吸也已



璿璣玉衡賦

王鴻緒

維天運之無垠仰蒼蒼於終古秉乾健以立德普覆幬  
於六宇殫智慮而難窺藉法天之聖主粵稽軒轅受命  
披圖作覩大撓占斗綱隸首立算數容成作蓋天臾莖  
推莢節羗星官之羅列順四時而步天武傳自陶唐彤  
車白馬爰造璣衡分經準舍欽若勿違授時函夏揖讓  
有虞祇承玉厯仰觀俯察朝乾夕惕碧漢高低星辰的  
皦目營心維斯程是適爾其為璣也如輪如轂象天之



圓繽紛合沓碁布星躔煌煌煜煜璀璨編連擘夜光之  
徑寸綴瓊宇之澄鮮爾其為衡也取質荆山是琢是雕  
中空外堅美麗瓊瑤似截瑯玕之竹如橫鳳閣之簫用  
以斜窺夫列宿睨視乎層霄至南極北極作天樞紐出  
地入地或昂或否衆星分羅如臣拱后天穹窿而旋左  
日月星辰錯落而旋右總度數之勢如皆於是焉觀其  
休咎若夫曜靈東浴玉兔西生拂扶桑而沉細柳揚素  
娥而瀉銀瀛一則乍贏乍縮一則半虧半盈時而重光

重潤時而或犯或凌苟按器以潛思洵燭照而有徵迺  
熒惑處南重華居東太白西而辰星北填為土德宅乎  
其中既稟性之各異亦徐疾之不同月陰精而具陽日  
陽精而秉陰金水受光於火日木土資生於水金他若  
羣星之隱見盈萬羅寥廓而森森無不繫靈機而知數  
倚玉管而探尋於考中星實辨昏曉秋虛冬昴夏火春  
鳥譬循環之無端猶翔龍之旋繞定四序於代更割陰  
陽於忽杪至稽行道之黃赤分內陰與外陽蟾魄之青

朱黑白義御之冬短夏長一南而百物彫朽一北而萬  
彙輝煌等瑤琨之交織縹七襄而成章皆璣衡之妙用  
察天道於微茫何三代永守以為寶遭函關一炬而消  
亡迨經營始於洛下鑄象肇於壽昌錢樂造為銅渾猗  
尺度而寸量更若儀名六合制起三辰側立斜倚分其  
位黃環白環運其輪儼四游之在內準直距而維均恃  
衡管之俯仰占晷刻於冬春洎仰儀簡儀之迭變候極  
立運之紛綸師古帝之遺法曠千載而同論苟厥德其

不回何妨乎創制之維新我

皇上文武聖神誕膺景命體天行而作則順民時而立  
政合二氣以相宣調萬年之金鏡念乾符下孚於

君德必

皇衷上契乎穆清故前民而開務謹時憲於元正離光  
騰而物照冰輪現而景澄則

宸躬之日月常升恒也視為木而主明貌為水而主恭  
聽為金而主聰思為土而主睿言為火而主從則

君心之五行恒肅雍也無形之七政運行罔息在中之璣  
衡不聞亦式雖上極夫皇王之盛治疇得以絜崔巍之至  
德將使日月循緯五星同色比重華之遊河入昴同放  
勲之睹景出翼相與游乎卿雲之縵縵暢九垓而彌萬  
國

璿璣玉衡賦

有序

湯斌

臣聞蓂莢初生古帝識明時之義澤火成象大易垂治歷之文朝廷之政令未施奉若之儀規先備蓋敬天即勤民之本而法天實凝命之原自容成定握算而六術已昭黃帝聽合宮而五行較著南正司天北正司地重黎釐職於陰陽暘谷候春昧谷候秋羲和致嚴於分至莫不仰觀俯察上律旁羅然存其理而缺其儀未盡觀占之哲有其數而

無其器難成察稽之功尚考虞書聿垂偉製躔度  
窺於寸管文星運於圓機聚山澤之精華極人工  
之賁飾誠授時之要術步歷之宏規也然而至德  
難聞成模漸斁精思罕遇不無章會之訛參驗或  
淆遂有統元之悞以建申為建亥魯人之月令無  
憑以食卯併食辰齊廷之度數何舛太初厯稱遂  
密壽王猶議其非乾象術號精深韓翊尚指其短  
固由天行之難定實亦制度之未精觀會通於古

今應彰明於

昭代恭惟

皇上履端建極麗正凝神日就月將光華協于天地朝  
乾夕惕奮迅象乎風雷道在欽崇凜曰明而曰旦  
功深宥密謹亦保而亦臨時憲之厯久頒永年之  
法新勒合元會運世之終始辨五十二家之殘叢  
將見合璧聯珠歲書太史大章含譽日紀靈臺乃  
復尚稽典謨究明遺憲旁招庶士敷奏鴻詞將假



翰藻而明三才藉筆泉而協五紀臣罔窺理數素  
昧天人幸際昌辰敢辭蕪陋謹獻賦曰

緬鴻蒙之初闢邈莫知其紀極仰寥廓而無垠識蒼蒼  
之正色渺終古而左旋疇轉輪而不息羅萬象於周廻  
建極紐於南北三垣表內外之宮庭列宿畫中原之邦  
域圜九重兮誰營里九萬兮孰測維邃古之神靈肇觀  
天而作則揆茫茫之元化總睿聖之範圍粵重華之膺  
籙紹放勲之巍巍初受終於文祖乃躬覽夫萬幾方類

裡之未舉首申命於衡璣蓋執中以體會於淵穆自觀  
察而效法其精微亦猶七十載之光被四表其功用惟  
本天治人而不違若夫魁衡招搖之密運陰陽寒暑之  
潛移非參稽之不爽何庶績之咸熙矧乃天雞曉唱羲  
馭晝跋朝浴滄海夕耀崑崙景近極而炎暑景遠極而  
易昏居牽牛而一陽來復舍降婁而春風自溫燭龍未  
足誇其光彩夸父無由效其駿奔至夫繼離宵曜夜光  
融融朏朏警闕朏魄示冲應潮汐之消長從箕畢而澤

風日退度於十三遂置閏而成功再如木德行仁太白  
秉義熒惑主禮辰緯藏智惟填司信位王四季或期歲  
而周天或累年而遷次或方進而復留或既分而忽會  
信薄蝕之有常乃伏見之難泥初偶乖於繫黍久漸易  
其機樞何以測算不失於晦朔氣數罔愆於盈虛惟至  
人德合蒼昊制準乾圖璣運外而規圜衡當軸而虛中  
兩極相望於直距九行環繞夫紫宮大梁實沈之周列  
鶉首鶉尾之麗空四游兩環定經緯表裏之準三辰六

合挈卯酉子午之針運躔離於晷刻轉造化於尺尋東  
作南訛畢協於節序攝提孟陬宛肖夫天心隨波降升  
似昭回之銀漢與日環繞象靈烏之迅飛晝晦重陰而  
儀度不愆烈風雷雨而僭忒不譏飾以鴻寶綴以美璣  
瓊壁精瑩雲霞之色可挹夜光璀璨星宿之芒依稀雖  
曰以管窺天何能持小而測大要之因衡察象實可殊  
途而同歸後若萇弘子韋之探蹟索隱梓慎裨竈之極  
渺窮工殷周之巫咸史佚魏齊之石氏甘公王朔唐昧

之觀星候氣尹臯吳範之視日規風漢唐則壽昌一行  
之術密宋元則沈括守敬之業崇其用器也踵事而增  
華敷衍而不窮或造輪扇而刻木或倚渾儀而鑄銅或  
削蓮花以傳箭或斲觚稜以盤龍誰能不祖奧旨而述  
成規遂可察氣數而合蒼穹豈若倚蓋彈丸蟻旋磨轉  
術家之微渺無聞法象之探索猶淺彼張衡之藻翰稱  
工洛下之經畫推善靈憲之圖書猶存歲差之考稽難  
舛損益適宜縮贏合撰足以驗同氣於天人通至誠於

幽顯是以帝王俯察人事仰觀天則時幾必勅視聽毋  
惑常扶陽而抑陰更緩刑而尚德雨暘寒燠若其序歲  
月日星順其職皇猷玉潤而東壁聯輝帝典金清而左  
角不忒煌煌乎執大象而撫地中面稽天若卜年萬億  
敬抽毫而作賦若身隨皋夔之班而遊唐虞之世



璿璣玉衡賦

梅文鼎

至哉渾儀之為器也體天地之撰類經緯之情極深窮  
高闡微致精殆更僕莫殫其蘊累牘難悉其形者矣粵  
自道生宇宙肇為大圜健運無息東西幹旋七政錯行  
宿離糾紛交光羅絡終始相嬗雖有離朱孰闕其端聖  
哲挺生繼天立極開物成務叙疇作易俛咎仰觀蹟探  
隱索諗六虛之曠邈詎目營兮可獲廼範金兮為儀縱  
若衡兮八尺厯以之治兮象以之覈堯命羲和四隅分



宅制閏成歲釐工熙績匪有器以御之孰所憑而推策  
虞帝受之璣衡以設敬天勤民兩聖一轍嗣三統兮迭  
更茲重器兮罔襲陳東序兮天球惟河圖兮為列蓋先  
聖之法物豈司天之可闕嬴秦力政蔑棄天常遷周九  
鼎焚燬舊章球圖湮沒莫知其鄉歷紀垂次伏陰愆陽  
及夫漢造太初渾天初置惟意匠兮經營莫詳徵乎昔  
制曾黃赤兮未分矧歲差兮能治歷唐逾宋代有討論  
小異大同踵事增新說存諸史約畧可陳外周六合八

觚三輪平圓象地以域昏晨子午雙環樞紐中尊卯酉  
交加日月之門是立郭郭以挈三辰黃倚赤而相結剖  
二至與二分判發斂兮南北距紫極兮為言小環四海  
又居其內左右周闕兩簫更代低昂斜側折旋唯意儀  
三重兮共樞亶推步兮精義亦有銅球實惟渾象列星  
綴離三家殊狀或附益之兩曜類蟻行兮磨上遲速行  
兮一機或水轉兮摩盪非不研精覃思窮神盡智象重  
大兮易膠每機關兮弗利儀重環兮掩映或未宜兮窺

視加以代易人湮乍成旋廢造之也綦難用之也匪易  
若乃元祖初服廣徵碩儒有美魯齊王郭之徒既作授  
時備器與書高表四丈承以景符簡儀候極離立扶疎  
二綫代管分杪乘除度百刻兮天腹旋立運兮四虛闕  
几兮測月蓮花兮挈壺正方有案兮定南北懸正坐正  
兮九服之須仰儀兮虛而似釜度斜絡兮南極攸居可  
謂酌古準今洵美且都者矣歷年逾百有明膺命雖大  
統兮殊稱實授時兮為政屬作都兮石城旋京邑兮北

定既觀臺兮屢遷地更寘兮乖應豈儀器兮多迂抑疇  
人兮弗敬寧弗善厥初兮歲薦更兮滋病經生既非所  
習兮又圉之以禁令占測算各分科兮或承譌而罕正  
設官司歷幾為文具交食或乖誰知其故爾乃海西之  
士萬里來賓奉其師說備其諮詢如禮失兮求野似問  
郊兮識官實閤符兮周髀此久缺兮彼傳於是吳淞太  
史仁和水部夜譚晨鈔心追手步亦得請而開局集歐  
邏與儒素擷西土兮精英入中算兮鑪鑄屢清臺兮襍

候多密合兮可據怵巧拙兮相形新術良兮羣茹厯既  
成兮弗用書十年兮徒著何人事兮多違或有待兮天  
意茲遇隆時體乾出治頒朔正時上符古帝洞新法之  
合天可永遵為定制既測驗之無差豈中西之有異哂  
陋儒兮泥古騁小辨兮譏評若盲不杖兮聾別竿笙斯  
術之無弊兮經指摘兮益明乃詔太史乃咨在廷謂新  
厯兮允臧顧儀器兮未成式采銅兮名山鳩哲匠兮上  
京備製兮六儀各錫兮嘉名赤道兮法動天之西轉黃

道兮順七曜之東行古二道為一器兮聊彷彿其斜橫  
今別其用兮法以簡而倍精黃既麗赤而左旋兮復右  
還以計程緯度之各異兮亦異其經黃自有極以運兮  
測距度以為徵日心正對兮遊表是承時時可驗節候  
兮若響於聲地平之儀辨方正位轉綫參直三光所至  
出沒之度漸升之意秒忽微茫具可別識象限平轉兮  
測高與庫割圓八線兮於是焉施合四為一兮周天在  
茲度惟九十兮厥數已全紀限六十兮於以參焉正反

隅角兮靡幽弗宣用稽距度兮兩星之間弧三角之法  
兮推其所然五者相資多人分測片晷之餘各盡目力  
假變行之迅速蓋須臾之罔忒別有渾球全賦星躔循  
黃之極碁罅珠聯列曜遠近南北八度小輪之限準斯  
無悟亦依赤極出地有恒或正升兮斜降或正降兮斜  
升晰伏見之先後信里差之足憑黃緯之列兮百世無  
改宮分迤差兮恒星東滙以度計年兮六十六載下設  
旋輪兮應時周動刻漏罔僭兮機發於踵爰有高弧繫

之天頂地平經緯相為形影或象限兮平觀或紀限兮  
斜距或黃赤儀之所窺絜之球而參遇爛若軒轅之寶  
鏡兮縮圓形而周布衆儀得其散兮球徵其聚正求兮  
反映宛轉兮迴互測量有書兮或不能句摩挲斯器兮  
曠如揭霧更旋宮兮十二隨道里兮攸殊際地之極南  
北兮以爲之樞子午及平環兮以限四隅隅各三宮兮  
東方為初次第右環兮大權以區三合六合之照兮凶  
吉分途惟斯球而可覩兮考步竿之密疏致用萬端未



克枚舉洵天府兮奇珍昭大法兮來許若其鎔金有術  
棄滓取精磨礱砥礪光輝熒熒旋之中規直之中繩擘  
劃勻細大半畸零重心巧測銖兩無贏惟寘儀兮合度  
雖久遠兮無傾趺交之以銅龍兮或海獸以相擎為水  
準與螺柱兮常消息焉取平夭矯兮騰蹕攬擎兮猗猗  
詎美觀兮一時永奠定兮千齡乃至崇臺百步迴出闌  
闔周以儲胥纖埃不至上列六臺方圓式異相依兮交  
讓旋觀兮罔閼施窺筒之奇巧盼千里兮如對晝候兮

日面之星夜占兮句已之態折照浮光兮氣水水氣清  
濛厚薄兮地心相配交食淺深兮起虧進退地景厚薄  
兮青綠明昧視差有多少兮命天九重月有弦望兮太  
白攸同抱日為輪兮互入相容超西法之舊兮信天能  
之弗窮登斯臺也軒豁洞達耳目開通揮斥兮八極廣  
攬兮無終意氣兮飛揚凌虛兮御風習其器也陸離瀟  
灑繽紛容與爛漫兮卿雲昭回兮星野照曜兮焜煌周  
流兮軒翥懷臨汝兮旦明遊吾心兮太古帝載之於穆

兮陟降其所垓埏之遼絕兮敝之一黍匪重黎之遺迹  
兮曷其臻茲要眇邈祁姚之不作兮疇復探斯奧窔伊  
崇效而卑法兮協至德於太灝定百代之猶豫兮踵惟  
精於帝道畢遠臣之巧思兮備前王之所少璿璣玉衡  
之不傳兮乃今而獲聖人之大寶亂曰巍巍穹窿帝所  
則兮小心昭事惟合德兮寫以良金如肖像兮父乾母  
坤斯瞻仰兮子之於親視無形兮對越在茲曷敢以寧  
兮兢兢業業承天休兮奉若不違升大猷兮祈天永命

從茲始兮億萬斯年昊天其子之兮



瀛臺賦

葉方藹

惟

皇清受命混一海寓建邦設都開疆啟土煥紫宮之喬  
皇輝丹闕之耀麗五雲鬱其上浮九重屹其雄峙固已  
運中央設萬國奠六鼇輦四極樹無外之宏模立不騫  
之遐則者矣爾迺

皇上聽政之暇思以

睿情洽

宸歡頌匪日咏斯千爰循故國之遺址聿起

新朝之壯觀歸乎其所謂瀛臺者是臺也聳金墉之西  
隅環玉河之四匯矗鴻濛而建標映觚稜而交彩俯雲  
霧以檻楯捫星辰以戶根廓遐覽於九州迺景福於千  
載寧良工之役其鬼神直上宰之移其蓬海觀夫紫祀  
霏微碧基深宵層櫨揭蘂飛梁夭矯陽馬驤騰於四榮  
陰虬躩踞於八表芝栢煥其戟尋桂柱挺而踔躑爛朱  
綠之璘璫續仙靈之縹緲金鰲玉螭連閣道以紆迴雕

碧文珉緣御墀而窈窕中復藏溫室理曲房蘭牖藻井  
螭栢鳳牕瓊寮珠戶玉陛瑤璫青璫歲蕤夫綺疏丹牕  
歛衽乎雕梁既宮我而霞竊亦蜿蜒而軒翔瞻矚周旁  
俯仰上下其翼然者為亭其曠然者為榭其幽然者為  
淵其呀然者為罇鸞簫象管奏

天樂於芳朝雲錦霓裳奉

宸游於清夜山則林麓深靄岡巒參差嶮巖岵嶢峴  
鬼疑玉女捧盆而上睨仙人引掌而下垂湧寶地而傑



立非神變其誰為水則發源西山沂流渤海汎濫洄滌  
砰礚奔駭走碧沙以汨汨激白石其磊磊似弱水之蕩  
潏乎神居望瓊樓珠閣而霞黠則有珍樹敷榮瑤草含  
秀迷穀洊開華平長茂肅慎貢夫維常拘彌獻其變畫  
紛沓蒼鬱左右前後畜九真之祥麟園林氏之騶虞馴  
條峯之蒼鹿閑大宛之赤駒鴻鵠鸛鸞互頡頏於霄漢  
鵠鵠鵠鵠爭唼啜於菰蒲青儵裔與而遂其羣育白魚  
跳躍而應其貞符時維春也句芒司令太皞乘權萬木

紛其向榮百彙呈而鬪妍條風披拂淑氣回旋

天子於是御蒼玉之輦載青帛之旃望籋筐於桑野省  
錢鑄於農田頌菁華以敷賁達幽滯而昭宣或賞花而  
作賦或垂釣而摘篇時維夏也長嬴序臨祝融炎煽平  
疇麥登凌室冰薦美嘉木之留陰賞芳蓮之發綯

天子於是彈五絃之琴揮七華之扇驅浮塏於太空引  
神飈於綺殿既解愠而阜財亦覽時而察變豈繡嶺之  
能方而甘泉之可羨若夫白帝改候青女戒時百物告

瑞萬寶薦釐

天子乃復出重雷降層墀駢大丙擁羣祗講獮狩之典  
習戰陣之儀八旗雷動七校雲移曜霆掣電搏熊射羆  
弧彎而蒼隼落劍舞而白猿馳九以順金令之肅殺而  
代造物之威施至於北陸迎暉南方見昴虹影既藏雲  
物斯考

天子乃復扃神紫微棲心元顥爰燕息而深居用恭嘿  
而思道牙籤錦軸朱文綠字之奇玉匣金縢大貝赤刀

之寶周廬環護夫百靈宥密靜通乎萬肇於戲斯真所  
謂斟元化順亭毒攬金鏡調玉燭酌兩儀之節宣統億  
萬於掌握爰窮高而極深自膺福而綏祿故能奢未及  
侈儉而不陋規遵王度動中得趣構成靈闕結為神宇  
擬玉虛之清都恍太乙之紫府觀者目眩而精搖聞者  
神動而色沮斯固侍從之方朔不能馳辨而逞詞待詔  
之相如毋庸揆藻而抒麗者也爾乃下里之士負書珥  
筆挾榮周京觀光上國躑躅鵷班之後徘徊象魏之側

喟然興曰夫詩書所陳史冊所紀唐堯茅階虞舜蒿柱  
混沌淳悶不可久處若夫周有靈臺而興秦以阿房而  
廢未央建章臨春結綺神仙長年艮嶽瓊宇或藉之昌  
或荒以圯惟居業之不同斯處室之各異今我

皇上端而虛儼而佇高拱九元洞矚萬里咨臯夔訪伊  
呂解網縱禽吹律回黍貌言視聽被其思歲月日星符  
其序雨暘寒燠四時若其官食貨賓師八政修其紀是  
以庶徵應百福綏遠為和風近為朝曦及物物解被人

人怡練太和於神明動歡欣於四支雖一游而一豫亦可咏而可思夫臺之以瀛稱也唐有瀛洲之榮宋有瀛館之選皆以處夫石渠之英而集彼金門之彥顧何草茅末品蓬蓽微賤亦得翺翔碧霄眺瞻清殿繞龍鱗而識

聖顏移雉尾而窺宮扇深荷

高厚之神施敢矢涓滴之微願請為作歌以志舞抃歌曰維

皇有道無反無側維

皇有路蕩平正直

皇在靈囿熙熙長旦景星紛陳卿雲是爛

皇在靈沼澤沛恩浹海水無波江濤有截

皇之出兮百神駿奔雨師灑道風伯清塵

皇之入兮元一守戶以翼以于是篤是祜惟圓錫蓋惟

方獻輿惟岳輸固惟溱效濡億萬斯年我

皇樂胥

懋勤殿秋蘭賦

有序

葉方藹

臣方藹於七月二十四日入直

南書房

臣英臣士奇示臣

懋勤殿秋蘭賦二篇竊念蘭微卉爾得沐

禁近之清光荷

天顏之一笑何其幸也

臣

又聞十室之邑必有忠信十

步之內必有芳草山陬海澨含英孕奇者何限物  
倘有知欣欣向榮之情曷能已乎於是廣此意而



為賦曰

覽大鈞之播化察卉木之殊類庶土所滋繽紛蒼萃或  
品下而栽榮或質幽而地賴惟懷芳兮處崇斯揚蕤兮  
呈瑞相彼幽蘭精英淑粹當其萌茁於山陂也靈根所  
託不高不卑陋下澤之沮洳厭層巖之嶮巖倚翠微之  
徑曲緣碧澗之水湄含華吐秀芬敷色披背綠施與資  
弱暎杜蘅與江蘼夫其抱馥雖殊應候自若冬索春敷  
夏茂秋落乃有類同稟異貞姿晚萼勾芒升而綳葉始

抽蓐收御而朱英方折衆皆黃落以萎摧此獨流馨而  
綽約貞潔兮似抱德以待時晶英兮類協期而知托依  
赤墀入紫閣長結蔭於玉除永棲影於金谷且夫  
懋勤之為殿

聖主於是乎寧神端拱怡情典學擷先哲之菁華藻圖  
書而丹雘綺疏日上兮鉛槧纍纍櫺檻風來兮芸香漠  
漠延載筆之儒臣褰穆清之淵幕於時松牖始秋梧宮  
未霜蓮潭變彩竹院生涼蒼苔縈砌瑤草拂廊開琅函

而氣爽抽鳳藻而思颺爾乃綺牕之下綈几之旁翠枝  
縹蒂紫莖綠穰天香流兮拂拂幽蘊發兮揚揚至如陽  
暉早曙露濯清宵鶴羽初警蛩吟乍撩蚪簷晚靜蛛網  
晝寥挹孤芳兮若遠若近玩貞姿兮永夕永朝遏青裳  
之薰鬱黜將離之艷妖亭亭兮如謇諤之臣矢冰心以  
環列左右纚纚兮如潔修之士敷玉藻以掩映

宸霄彼夫度索之桃實三千扶荔之甘蕉十二陵丘蟬  
聯臯澤搖裔者不可勝紀皆擯置而不陳獨此蘭之繞

砌於以見崇質而斥華尚德而賤藝栽培乎素履之林  
掇採乎晚成之蒂根深而其膏必沃植厚斯其功弗替  
豈無緣山被阿枝叢葉歧怨空谷之莫采經霜霰之淒  
其則與麋鹿偕處腐草同萎空寄生於野人之圃或分  
時於山谷之坻雖烟霞之賞愛奚崇高之見知臣聞去  
蕭艾惟虞未盡藝蒲蘭常憂不榮何難羅三湘之秀擘  
七澤之英盡九畹之種空百畝之羣上窮嵯峨之顛下  
澈清泠之瀆拂之拭之兮咸登

有道聖人之側俾流徽於宣化之闡崇禮之廷而且林  
總兮萬品之蓊鬱扶疎兮千世之蔥菁

會同館賦

盛符升

若夫風雨之交河山之固帝王所以宅京也車書之會  
道里之均遐邇所以來庭也故北鎮始封流沙西被而  
東矢既貢駢乘南行惟八荒之在宥斯九譯之咸臻服  
紈牛而馴露犬供珠樹而獻素禽以至飛車乘毳沒羽  
浮金賁虞周所未賁臣軒頊所未臣莫非太平之盛事  
因為一統之常經至於懷方有氏象胥有官治其委積  
致其饗飧皆昔王所以崇禮數重郵傳也我

朝肇域東方親附莫先於蒙古自白鶴之夢應於秫田  
玉璽之祥收於察部而相率來歸者或義屬一家或恩  
周萬戶即今四十九旗之衆奉貢請安者歲時踵武所  
以理藩有院特為開府他若賓服之三方則會同館為  
之主也原夫共球肇啓東自朝鮮節貢者三年貢者一  
其臣事為最先赤瑩朱提比於三品蘭干罽毼擬於絺  
織豹獺取織皮之備紙米當穗稭之全而其仰被恩施  
者特厚賜金印賜裘馬免鷹免弓減粟減綿所加禮者

已六十年西有吐魯番則回族也地本車師關通嘉峪  
昔爭哈密而構難於前朝今合五城而入貢於甘肅所  
進者西馬羚羊金剛玉璞亦有駝鷹蒲萄旃罽刀弓之  
屬

朝廷念其荒遠貢為遞減而賞從優渥由粵西而入者  
安南黎氏也龍編雉贄數款祥州玉節星輶時臨富水  
期兩貢之並進定六年以為紀厥貢南金博爐燭銀縷  
簋加以薰陸沈箋犀角象齒因其君臣能慕義以獻功



仰承

宸翰有忠孝保邦之褒美至於粵東之貢道非一其南而西者為暹羅地多犀象俗貴香茶翠毛雀尾紫梗椒花紛織文與白氈兼藥石之繁多其西南之絕遠者為西洋舊有古里鎖里三十餘國散居海疆若今之波而都瓦為前代所未詳數其庭實亦有珊瑚琥珀哆囉伽楠象齒犀角油露諸香後以貢獅復至義更重於來王今其人之向慕華風者多留處舉門之陽而十萬里外

更有異士星歷擅長生在拂覽勞績尤彰其由閩而入  
者為東南之琉球也居馬山而依龜嶼歷彭島而入湄  
州二年一貢臣職克修封使再遣禮節殊優復軫念其  
地瘠自銅琉海螺而外槩謝却而弗收而中山世土之  
題榜

天章炳炳於遐陬兼許其陪臣子弟雍序來遊斯文教  
之遠被足司契於懷柔其昔道粵東而今由南閩者為  
荷蘭地居險遠貢以八年充庭之盛過於諸邊如珊瑚

琥珀玻璃玳瑁皆珍錯之駢闐及哆囉啤吱洋布矮緞  
復紈綺之斑斕雜以刀劍鞍馬檀椒香露番花番寇毛  
毳毛氊而海氛未靖之日又能移兵助勦功成夾板之  
船所以彤弓載錫嘉其至而勞其還他若西陲之有番  
寺乃土番故地也元為郡縣俗尚浮屠明初因之改立  
僧寺今之在洮岷者二十六在西寧者九來則各加恩  
賜其烏斯藏為稍大或稱王或稱法王或稱國師或稱  
禪師厥號各異地由滇蜀以逮秦隴義取外扞而兼內

衛此又効順坤維甘肅以南之屏蔽也方今海水恬波  
扶桑銜日商舶環通泉流外溢將銀甕竹杖之咸臻亦  
鳳穴麟洲之可陟則又有四譯之館以待殊方之遙集  
雖吳客之稱大歸西賓之譚無外安足以罄其頌述哉  
臣職次禮官預聞南館有通事以待朝鮮有司賓以通  
四遠致饗致餼之俱詳掌環掌訝之是典更有三館二  
廠聚其馬馳收之牧苑雖析為有司之職守無一非  
聖澤之流行也頌曰環館開弁衽來趾相錯兮玉虎鳴

銀麈八增式廓兮越火枝浮瑤水窮禹鑿兮或冠帶或  
椎結紛戍削兮梯航會筐篚陳奇珍爍兮六節通九牢  
具恩優渥兮守四裔家六合綿地絡兮東戶啓南薰奏  
樂兮



皇清文頴卷四十



總校官庶吉士 臣 張能照

校對官檢討 臣 王鍾健

膳錄監生 臣 劉復善

欽定四庫全書叢要

集部

皇清文頴卷四十二



詳校官候選知縣臣吳甸華

欽定四庫全書薈要卷一萬九千四百四十二

集部

皇清文頴卷四十一

賦

喜雨賦

有序

張英

康熙十有七年季夏之月經旬不雨暑氣煩蒸火  
雲麗空炎景燥物驕陽可畏恒燠有徵

帝心惕然念雨澤愆則難冀豐穰之慶陰氣鬱則恐為  
災沴之由爰發



德音下明詔懸帑鐸求昌言嚴恭寅畏齋祓於宮肅穆  
精誠禱祠於

帝致齋之次日乙酉陰雲四合電掣雷轟雨沛於中夜  
禱祠之次日戊子涼颼條至烟霏霧結雨澍於亭  
午於以滌煩潤槁育物寧人皆

聖心為之感而

天心為之應也臣英近侍

內廷備詳

宸慮職居惇史宜誌

天庥猥以蕪詞忝茲盛美敢拜手稽首而作賦曰

蒼蒼無垠者有象之天天心之所屬兮則在乎璇宮之  
側黼席之前蓋君身所以配帝而主極所以承乾故明  
作而幽贊兮若璧合而珠聯月維季夏律叶林鐘司辰  
者赤帝乘權者祝融覩陽景之南至仰大火之昏中維  
斯時也炎歊蒸鬱熾日蘊隆上無纖雲下無微風陽坂  
飛烟於火井羲輪銜耀於燭龍氣欲流金威能爍石濯

寒泉而猶溫對冰壺而如炙力已倦於蒲葵衣不勝夫  
絺綌萬戶千門六街九陌咸流汗之成漿或狂呼而動  
魄謂今茲之溽暑實罕邁於疇昔雖迎涼之殿寒露之  
臺珠簾高捲綺窻洞開其如畏景暄赫烈日昭回但炎  
威之四至鮮薰風之南來列子何以御之而泠然楚王  
何以臨之而快哉是蓋夏無時雨陽愆陰伏積此亢旱  
凝為煩燠胡以慰我三農長我百穀四野望之而警心  
萬夫因之而蒿目

天子曰咨在予一人雨暘有忒矜此兆民沛

王言之渙汗垂清問於絲綸爰咨卿貳民瘼悉陳輟朝  
撤膳興於朕身將有事乎

南郊先致潔於明禋於是端居穆清蠲慮澄志上達穹  
蒼捷如符契雲油油而被天雷隱隱而出地雨霏霏而  
入簾涼依依而生袂聽靜夜之霑濡覩宮槐之含翠此  
蓋

睿念之方興已獲上靈之報賜致齋三日時維厥明

天子乃御輕輦聽鸞聲享

園丘禮太清薦紫壇之主璧奏玉琯之韶謦穆穆乎皇  
皇乎合千官之肅而咸師

一人之誠法駕載旋爰居爰處惟德動

天翼日而雨石燕雙飛商羊對舞雲興於西日之方午  
始而度鳳城過龍樓氣靄靄而如暮聲颼颼而兼秋既  
而滴漉飄揚滂沱汪濊細珠濺於罌罍飛點侵乎綺綴  
其泛碧霄而下也若九天之瀑布高轉於銀河其緣駕

瓦而注也如百道之飛泉下垂於玉砌

天子坐廣廈啓彤扉歌有渰之淒淒詠興雨之祁祁任  
輕霑於瑤席從飄灑於

御衣

天澤無疆

宸顏有喜爰命侍臣憑高眺視優渥遍乎九垓霑足同  
於萬里豈止畿甸沐膏澤之施三輔獲田疇之美而已  
哉古稱雨金雨粟雨玉雨珠曷若靈雨澄映涵濡涼逾

瓊液甘若醴醕良苗乍起酷暑潛驅登斯民於富壽之域而又奚有貧札之虞蓋由我

皇之德馨香上聞故其動於中也膚寸而雨遍天下絪縕若泰山之雲更何藉乎土龍之屑屑與巫史之紛紛古人之言諒哉曰人主應天以實不以文

懋勤殿秋蘭賦 有序

張英

金風流火白露迎涼雲淨天高秋空氣爽

君王宵旰燕閒愛茲澄景御圖書之祕閣發清商之雅音  
乃有叢蘭獨榮秋殿芳香自發枝葉相扶植以青瓷圍以朱檻  
斯亦托根之至榮者也臣朝夕經緯味彼芳潔敬成蕪賦以奉

宸懽其辭曰

臣聞蘭之生也隱於空山被於幽谷故其守貞也雖無



人而亦芳其德馨也不因風而自續是以尼父興猗蘭  
之歌郢客和幽蘭之曲當其植根九畹毓秀三湘昔作  
騷人之佩古稱王者之香名楚臺而留賞啓漢殿而發  
祥養親續蘭陔之詠燕賓泛蘭渚之觴莫不惜茲嘉卉  
欽彼幽光慨自人誇春艷莫采秋英蔽深林而寂處偕  
衆草而叢生戲陰崖之翡翠侶芳洲之杜蘅惟敷華於  
山澤敢結想於蓬瀛一旦躋瓊階登玉宇拂珠簾迎繡  
戶泛上苑之風光含長秋之暮雨誠何羨乎蘭皋豈更

思夫蕙圃於時秋也螢光熠熠蟬聲嘒嘒梧葉初驚飄  
搖文砌碧筒漸老將殘玉井之蓮金粟猶遲未發小山  
之桂爾獨披紛翠葉葳蕤紫莖花繁露重體弱香輕娟  
娟自賞既嬌美乎幽人之潔亭亭獨立復比德於君子  
之清以此高致怡我

皇情內殿深嚴左圖右史久祛凡卉獨留瓊蘂枝垂宮  
硯色侵文几何馥馥之襲人每簾動而香起

天子丙夜陳書漏沉宵永風入戶而蟲鳴月臨軒而人

靜繞燈開壁亂之花隔幔送參差之影更憐落卉藉以  
雕盤置綺筵而留盼惜餘芳於未殘喜

君心之見珍荷遭遇之良難幸處乎朱門與紫闥永違  
乎長坂與層巒將寄言於邁軸敢託詠於崇蘭遂作歌  
曰有香草兮華且滋隣玉樹兮與紫芝自楚澤兮來軒  
墀枝挺生兮華離離感君恩兮欣自持觀秋蘭之獨茂  
兮豈微草之無知

駕幸闕里賦

有序

張英

皇帝御極二十有三載重熙累洽區宇乂安文德覃敷  
聲教暨訖乃稽古時邁肇事岱宗謁祠闕里典禮  
崇重恩澤優深臣庶懽欣遠邇嘉歎夫元和盛年  
咸平昌世僅奏六代之樂修再拜之文猶垂式簡  
編流輝今古詎有遠御

六龍親詘

萬乘展隆儀於稽拜施殊敬於儒先

聖德顯隆如今日者焉洵足以超軼往牒焜耀前紀也  
臣幸際昌時得瞻鉅典雖固陋謏劣不足以發揮  
鴻藻然珥筆承明職茲紀載頌揚

休嫩敢曠司存謹拜手稽首而獻賦曰

於爍惟

皇繼序纂光本仁祖義昭憲考章奠玉衡於神軸握金  
鏡於天閭調四氣以通正和八風而協祥於是西踰細  
柳東跨扶桑交河北徼比景南鄉靡不丹梯走傳碧海

浮航輸琛太府隸名職方耀幽遐以日月襲鱗介而衣裳越萬里以入贄重九譯而來王是以化洽太和道隆邃古納九垓之管鑰總堪輿之扃戶參天地之清寧儷貞明之作覩文軌合而謠俗同跂喙恬而草木庶軼埃塏而包混茫駕羲軒而凌三五焉

天子乃高拱垂裳中央運斗容與義林優游書數河賓丕宣洛符誕受典學宏文銘楹箴牖探珠淵之秘筌陟玉山之高阜德蕩蕩以無名治熙熙而何有既乃冲然

永念穆然深思曰儀象肇啟道法昭垂寔明寔熾惟君  
惟師羣聖一揆六經同歸王澤下竭頌聲式微孕星鈴  
於上瑞錫麟紱於昌期毓龍蹲之至德挺鳳跼之殊姿  
集大成於千古開絕學於來茲溯平鄉之懿躅景闕里  
之崇規庶幾哉聞見可接羹墻在斯舉時巡之隆典秩  
釋奠之隆儀爾乃乘大路控金鑊蹇翠羽捎文虹屬車  
按節繁吹鳴筩七萃鱗附千官景從馳道則五里十里  
旌門則一重再重集於泗水之上幸於尼山之宮斯時

也清羽司音初陽應律葭管烟霏芝房露出氣不慄以  
時寒序將周而朔易撫景物之澄鮮攬風雲之明瑟旌  
旗捲而廣野回春帳殿開而暮山凝色遂乃肇舉吉祀  
肅奉精禋春卿贊采祠官貶牲朱火西蘊玄酒東陳嘉  
籩廣豆豐烝潔盛振羽籥之六舞合咸英之九成薦祝  
號之明信導神絃之降迎穆穆

宸容靡靡天綽殊禮展謁隆文錫賚覲靈爽之長存儼  
哲人之如在感神契以潛孚體道貞而昭對洋洋乎優



優乎與珠庭月角授受於千載之間玉節金鉉疇答於  
一堂之內也禮度有嚴威儀告竣登堂入奧規周矩還  
瞻聖里之岼岼憩廣庭之靜便布兩楹以翼簪峙雙闕  
以星懸藉杏壇之修蔭挹璧池之素漣偃息於道德之  
府遡泳於圖書之淵於是芝蓋重葩龍旂曲柄貴擬一  
人尊侔萬乘述素王之嘉讚發五言之睿詠海嶽遜其  
高深星雲並其輝映斯則

聖天子蘊道之淳風崇儒之殊敬也簪纓陪位衿佩園

橋長裾霧會仙組雲影始橫經以讐問旋拊石而吹簫  
嗣遺言於姬孔沐雅化於唐姚禮讓之容咸近光於黎  
獻豈弟之澤庶作人於譽髦斯則

聖天子風聲之四訖文治之不昭也曲阜名區魯原舊  
聚陪敦土田復除繇賦增講肄之常員沛匪頒之異數  
推恩則徧及師儒錫爵則旁流支庶五經博士不遺凡  
蔣之封九命上公矣帝褒成之胙斯則

聖天子崇德之盛心興賢之宏務也於時采甸侯衛公

卿大夫期門式道執戟荷戈文學掌故之士垂髫戴白  
之徒縱觀典禮踰濟天衢涵濡化澤屬厭道腴既雀躍  
而抃舞亦鳬藻而懽愉萬人一口聲滿公車惟我

后之東巡修百王之令式答珍貺於三靈聽衢謠於百  
室卻瓊檢以勿祈屏銀繩而詎飾駟從清嚴儀文簡質  
吏不譏呵民無供億協時正律埒虞氏之省方納賈陳  
詩儷姬王之述職既陟山以裒對還翕河而問俗採哲  
陽之舊歌晞榮光之新燭朝宗滙江漢之波玉帛奉塗

山之錄非漢日之塞茭乃堯年之刻玉若乃慶惠殷流  
湛恩四周給租賜帛省刑釋囚虛衷清問博延廣諏如  
天光之下濟如露濃之上浮始汪濊於五土旋齋淪於  
九州今又茂明至道導揚正學虎炳龍章金追玉琢浴  
我以詩書宏我以禮樂盛德登閎大猷輝卓幘六合而  
被英蕤鼓八紘而排氛濁誠振古之隆規開天之偉略  
也

天子方且回輿京室倚佩軒墀道岸先陟德契自持庀

政考業基命敕幾辨色以臨黼宸視夜而啓彤帷定仁  
義中正之極稽因革損益之宜不懈冰淵之念彌勤  
鐸之思所以泰階順軌乾筴迎禧上理隆洽茂化雍熙  
治方侔於砥屬俗已進於循蜚四海壽康恬於鶉居之  
代萬年鼎祚鞏於鰲極之儀

朝

陵賦

孫在豐

皇帝御極之二十一載聲教浹乎遐陬威靈震於天宇  
蕩滇黔之頑克殄閩粵之狂豎鉄鉞既施典章具舉崇  
徽稱於

兩宮洽歡心於九土爰溯締造之鴻基修

山陵之禋祀進太卜而諏嘉辰兮詔宗伯而稽禮經戒  
豐隆以灑塗兮敕招搖使陳鉦閭道直漢以澄輝兮天

駟挾策而耀精羽林羅列以雲布兮鈞陳炳蔚而霞蒸  
時則斗柄卯指望舒景盈草芊芊以向榮麥茁茁其擢  
英迺駕蒼龍鳴鸞鈴馳玉軼仗霓旌宗正陪乘親藩奉  
較掌舍設桓虞衡庀幄芻藁儲於司農太常陳其廣樂  
詞臣珥筆以隨鑣通侯巡徼而秉稍六卿之屬備官七  
萃之屯列幕焱焱煜煜披拂以轆轤兮翠蓋金枝之旖  
旒也總總汨汨雷轟而電掣兮千乘萬騎之繁夥也啓  
闔闔而度郊圻兮道上谷之名區踰巉巖而徑雄關兮

循陽侯之所居靈龜負圖以獻瑞兮神龍蚺膠而奉輿  
天吳躩踞以趨蹌兮燭陰熠燿以先驅爰抵幽岐以瞻  
荒作覲豐沛而眺汾榆其地形則連岡崔嵬峻嶺嵒岼  
廣岫四開平原中廓近擁巫閭巨鎮欽岑巖高洞深拓  
陽翕陰遙揖長白綿亘峭闕淵潭窈冥動植焜碧他若  
華表通明木葉紫荊蜿蜒環旋孕仙窟靈幽怪神奇不  
可殫形其水泉小則松花錦川鴛湖沓渚淤為淖泥濛  
為浦淑大則襟帶鴨綠磅礴混同滄溟東匯衆水歸宗



驚濤浴日駭浪浮空其灌溉所滋地力所聚則沃茂稻  
梁磽叢蘄芋菓美榛松藥珍參附其鳥則鴛鴦鸕鶿鴻  
鵠鷺鶻鵲鵙睨水而聯翩雕鵠挾颺而高翔其獸則青  
鼠黃羊蛩蛩距虛獺麇貂狐野馬駒駝睹畜產之蕃滋  
洵山海之要都若夫洞闢八門周廻百雉麗譙天開雉  
堞鱗次其內則陌通巷接比舍連墉蘭綺柄植乎廣衢  
象闕簷構乎雲中有臨崇政有翼篤恭閣開翔鳳時乘  
御龍闕睢麟趾有恤其宮左宜文德右昭武功櫟廬錯

列漢之星扮撩拖垂天之虹其外則岡阜蟠護鬱鬱蔥  
蔥山河繡柱風雨蚪松仰

陵園之在望識王氣之所鍾則有分陝之卿陪京之守  
聞翠華之莅止競率屬而趨走又有髻歆之童瞠瞠之  
叟咸輟耕以望幸紛駢闐而恐後則見夫鴈班匐伏雉  
尾中開乾情顧矚而愉怡龍馭弭節而徘徊屯雲罕舒  
玉綬排金祀陟瑤階嘉樹威蕤以紛披重闔溫清而邃  
俟端斧宸於辰居肅容衛於崇廡乃與臯伊之倫丙魏

之侶歟精澄神齋心滌慮既吉蠲之允臧遂致覲於

列祖建梢星之旃樹歷天之旗駕踰輝之神駿翳曲莖

之華芝翕赫留霍蠖略褰綏卿贊采史誦詩宰割牲祝

陳詞揚戡定之赫奕溯謨烈之燕貽玉帛陳神人暢薦

馨香格靈貺駕鷺駿奔以肅穆兮瑞靄氤氲而彌望進

酥醪之圭瓚和泔淡之秬鬯盱蠻旁融焄蒿在上樛燎

燦灼於穹窿兮芬苾沛達乎漭沆既通誠而感幽兮知

景福之攸降於是歷神州而巡邊陲乘陽氣而講春蒐

幕漫天之罩張竟野之罟罾爵接陂澤民掩丘列缺施  
鞭蚩尤挽鈎綠沉砥鋒天弧貫鏃騎躍房心之精車追  
造父之躡矢選夏服之簞刃淬昆吾之鍔凡藩落之所  
窒蹙置羅之所絳幕义簇之所攬捫流鏑之所攬掣飛  
無遁翮走無逸足迺因前禽而示服猛借格獸以示鋤  
克捨翳薈之鷲麋縱巖藪之豸縱搜其吞噬之倫屠其  
牙爪之雄爰有勇逾五丁力若烏獲帶鮫函披兕革拉  
獠獷狻袒裼徒搏拉虎蹂貔屠狼蹙獬挫桀怒而遁潛

改咆哮以踧踖遂頰首而草面卒讐伏而就磔爾乃前  
網開飛羽停宋鵲止馳韓盧不驚設纊沉罾射蛟捉鯨  
鱮鮓既留鯽鰕就罟鮪鯉斯陳鯢鮓勿拒衆兆云獲觴  
行賞舉醕醴效燔魚梁澍雨應時嘉禾斯播

天子則勤思乎東作睠念乎萬幾廼返旆揚麾旋虬縱  
螭赤汗追風叱撥爭蹄鐘磬雷磕迴蒞郊畿勞五校賚  
九扈課農桑詢疾苦青災肆赦湛恩斯溥臣隣懽欣士  
女忭舞惟時小臣職忝濡毫才慚稽古熊館趨行豹尾

隨伍馬載錫乎天閑身長依乎輦路時瞻雲以咫尺每就日以承煦逢鉅典之喬皇沐

深恩而振詡拜手稽首爰作頌曰於皇上天眷至德兮聖武神功昭萬國兮顯承續述馨香格兮滂沛恩膏蛟喙殖兮宣豫惟時式厥則兮垂衣端拱精寧一兮明良賡颺百憲飭兮萬齡壽昌永無極兮



湯泉賦

有序

徐乾學

古者辭賦之作所以鋪揚鴻業詠歌盛治然竊怪  
司馬相如揚雄之徒矜夸車馬侈陳羽獵組織雖  
工於主德奚裨焉夫帝王之至德要道無逾於孝  
曾子曰孝者置之而塞乎天地施之而橫乎四海  
大哉其言之也臣備員史館伏見我

皇上奉事

兩宮先意承志聽微察渺可與虞舜姬文比烈矣湯泉



之幸親承

懿旨

鑒興所過宜有紀載私恐後世不察以上林長楊之製  
相為比擬殊失厥旨柳宗元云思報國恩惟有文  
章不揣弇陋敬摭蕪詞雖未足測高深於萬一庶  
幾矢報答於涓埃云爾賦曰

皇帝御極十有一載庶徵協應羣生畢遂鴻鴈來賓之  
候律中南呂之月霜清東野斗指北闕雲既淨而天高

潦將收而水潔

天子於是坐總章戒臣工宣長樂之

懿旨問溫井於無終乃駕

鸞輅載

龍旗千乘雷動萬騎雲馳石鎧犀衣之士連七萃而霧  
卷珠旃日羽之兵亘五營以星移其時旭日霽野慶雲  
靄天飛廉雨師灑道馳烟宓妃羸女奔走後先玉帳開  
而秋野生春寶炬列而暮川增曙香生櫓壘之間綵繞

粉榆之樹

聖心維則意切承懽

慈宮在路出入盤桓遇險道則親扶雕輦奉甘旨則手  
進珠盤見

玉色之愈和必柔色而問安欲坤貞之永固假炎液以  
除煩誠

孝思之不匱非往代之遊觀故吉行而徐進爰駐蹕於  
溫泉夫溫泉者為域中之珍瑞亦天地之神靈白磬上

徹丹砂下沉非神鼎而長沸異龍池而獨深五雲之漿  
比潤三危之露同清控湯谷於瀛洲濯日月於中營谷  
神不老川德彌盈湔灑腸胃澡雪精神醴泉消疾聞乎  
建武之世神水齟疴不數咸康之辰誠一沐而再浴延  
永算於千齡於焉停

仙蹕設

行宮樓枕嶺而倒影殿當川而抱虹長墉跨於障塞列  
岫插於鴻濛閼遠而寒暑隔峒堯而雲霧通繡帷四幕

層城九重水澹澹而岸花紫烟微微而野樹紅鳴文鷁  
於波面奏龍吟於水中玉女乘車而進悅神人灼水而  
擎鐘已溫和之悅體自第祿之在躬

慈聖既安

皇情愉悅乃講蒐苗飭羽獵張竟野之罟設垂天之罩  
虎落三峻崇山作碣圓經百里羽林羅列馳朱汗之馬  
校黃金之埒紫燕晨風紅陽飛鵲凡有名駒無不畢集  
為之擢倚天之劍彎落月之弓金甲霜鳴於曠野虹旗

電掣於長空羽毛揚兮九天絳獵火然兮千山紅乃有  
參伐之精負隅林莽喑鳴哮鬬摩牙甜掌川谷嘯而風  
生林巒聞而振蕩

天子為之抽金戈揮玉矢刃若星流簇如電駛南山白  
額應絃而斃谷振千羣山呼萬歲謂聖武如我

皇豈往代所能擬然後登九霄之臺宴八紘之圃管鳴  
而矯鳥不飛簞拂而輕花自舞五蹄仁獸以扶輪九翼  
威禽以節鼓是皆

聖孝之禎祥宜受昊蒼之福祐

乘輿旋返傾都聚觀歡聲振地紅塵障天散貔貅之萬  
騎聚駕鷺之千官

皇上方且心存得一學務函三問寢

龍樓聽政未央弘孝思之錫類謀寰寓之又安以河海  
為衽席脯麟鳳為漚甘合萬國之歡心極尊養之多端  
彼夫漢帝之遊灞澹唐家之幸醴泉豈足以比隆聖世  
齊歷大年也哉

西山賦

有序

徐乾學

國家荷天休命聲教四訖川嶽効職百神納貺芸生品  
物各得其所我

皇上膺累洽之運宣重光之德緝熙執競攷矻圖治萬  
幾之暇嚮意文學將以揚風扞雅潤色鴻業猗歟  
休哉小臣職在載筆爰極愚陋作西山賦一篇其  
辭曰

粵巍都之鼎建資作鎮以表疆環宅中以閔偉應形勝



而光昌猗茲山之秀傑允卓犖乎冀方傍

神京而稱輿衍控險阨而帶康莊乘兌方以定位鍾王  
氣而克當比金陵之牛首擁雍土之華陽夫其橫據居  
庸之塞直接太行之尾天壽嶂岬乎其前芳湖渟毓乎  
其趾蜿蜒綿亘絡繹斐疊苕苕亭亭奕奕暉暉或竦或  
峙或立或起或淺或深或俯或企或巖嶭而崩方或盤  
礴而徙倚互日月而蔽虧受烟雲而搖曳融怡容與坦  
迤迢遞周以流水間以疏泉澄泓澹蕩潏繞洄漩露白

石之齒齒滴玉乳之涓涓灑灑吞吐於谿谷硤礚空湧  
於巉巖石磴欹斜而造嶺飛梁橫跨而渡川則有珍禽  
異獸詭熊竒族毛羽繽紛齒草歷錄鵠鵲鴛鴦猿鼯麋  
鹿黃鳥飛鳴雌雉飲啄啁嘈睨眈之音狡獪奔騰之足  
虬姿松柏鳳林梧篠棗柿茂密杞栝窈窕芍藥榮敷丁  
香繚繞春杏霏紅而倩粧秋楓鋪錦而如燒殆難得以  
備稽不能悉以名貌若夫寺宇之盛金碧之觀丹樓霞  
蔚紺殿雲寒飾銅鏤以彩畫錯珊瑚與木難耀棟橈而

爍爍綴簾櫳之珊珊慨承平之物力撫陳迹而迴環睇  
碧雲之飄緲過香岫而流連瞻來青之題額緬翰墨之  
猶傳更遠懷於往古考碑碣之殘篇記金遼之軼事惟  
雙塔其宛然至於勝國諸陵丘墟莽互銷沉華表之陰  
滅沒冬青之路玉魚帝子之宮金椀茂園之墓一吟禾  
黍之詩永鑒興亡之故洵矣壯觀靈宅真區我

皇顧之其樂只且風物繁盛氣象麗都人民來往肩摩  
車驅遊人如雲而萃止行客眺聽而踟躕伊天作之有

自固指顧之憑依覽山河於襟袖識帝眷之在斯宜我  
皇之高望更穆爾而遠思紹謨烈於文武享景福於神  
祇升陟識德授簡稱詩笑秦始之陋刻嗤漢武之靡辭  
巨靈兮式歌且舞山嶽兮載懷載柔秉心抑抑布政優  
優燔柴望秩仁覃九州嘉祉駢臻愷澤殷流含情珥筆  
拜手吟謳乃為頌曰倬彼西山崇岡巨阜百里

京師在

帝左右紫氣常新地靈單厚鬱鬱蒸蒸離離黝黝於萬

斯年受天之祜

聖駕時巡賦 有序

徐乾學

恭惟我

皇上堯兢舜業宵旰時幾運不息於乾樞應無疆於坤  
軸煥乎文思赫斯武怒敷天率土輦賁航琛俗已  
登於淳古世已躋於仁壽矣猶恐郊圻之外幽隱  
之域民有不得其所者將

親拊循之於是舉正望秩之禮式遵時邁之文損益舊  
章皆應經義虎賁羽林簡發省約勾陳將啓

渙號肆赦已逋給復湛恩布濩乃

遣祠官備物典冊懷柔百神

翠華所至始於東嶽岱宗爰及鍾山明太祖陵還過

先聖之鄉皆

躬致祭焉經塗幾於萬里往來曾不踰時供張弗煩有  
司芻茭弗費百姓商無遷肆農不輟耕恤菑患問  
疾苦懲貪墨獎廉能觀民設教省方之義備矣自  
虞周以來三千餘年復見今日微臣預載筆之末

敢忘盛德之形容哉謹上

聖駕時巡賦一篇

惟二十有三年秋九月

天子時巡於東禮也

帝德廣運壹體遐邇靈旗既偃威弧既弛鯤溟啟而我  
疆兮卉島來其侍子迺奇祥異瑞之游臻兮何茅黍鰈  
鷁之足紀

聖人端拱京邑翼翼奉三無私建五有極協恭同敬守



官遵職府事已底於歌叙兮聽覽猶勤於朝晁將采風  
而觀民兮必展義而徧德若稽虞典載陳周詩司南行  
漏權輿震維職方先我於修守兮太卜習吉以告期

玉輅徐動夫清塵兮金雞先降夫紫泥從官咸精騎而  
輕行兮緣道每紆軫而解駢於是天行雲轉風輕日麗  
山祇傳警水后稱蹕栻栳再重獵貅七萃問土訓九州  
之圖飭形方華離之事後騎方動乎畿甸前驅已屆乎  
齊地華注蠡其削成滌源激其感沸抵介丘而遂上屏

鑿輅而步至笑八駿之無庸嗟四載之已瘁修禮秩於  
視公陳祝冊而非秘爾乃訪謠俗就高年靡幽弗耀靡  
隱弗宣進秀民而勉之嚮學兮召農畯而告之力田加  
慶讓於司牧釋怨憤於閭閻星旆曉移雲罕晝遷笳吹  
引路鑾音度阡香稼岐穗而夾輪兮朱實交柯而承蓋  
睇萬井之生烟兮眺千岑之凝靄屬車無塵而肅肅卷  
阿從游而藹藹或來歌而載賡以中孚而交泰也

天子顧侍從而言曰翕河長瀆肇自皇初灑沉澹災相

協厥居羣臣拜手稽首曰都禹之明德其遠矣乎

天子神聖纘禹之謨爾乃親循版築周覽厩渠叶潤下  
於洪範兮幸德水之歸壚桃花泛而無害兮竹箭疾而  
何虞

皇情豫以繾綣兮

天眷切以躊躇陋漢帝之負薪勞使者於河堤圖有蘭  
葉之瑞歌非瓠子之悲信安瀾之在望知錫圭之有期  
然且疇咨水利民隱是恤覩淮南之巨浸訪海陵之陳

迹五湖積潦而橫流六港淤沙而久塞匪疏濬以為功  
恐畎澮之莫洩將

命冬官博謀長策庀器鳩工不愆於日俾慎始以圖終  
期一勞而永逸當斯際也降輦御舟維綃鼓柁萬乘飛  
渡六龍迅掣祥飈送颿

宸衷怡悅詢井絡之濫觴念導江之往轍升盤巖兮設  
旌命戈船兮成列指南徐之睥睨俄北固兮截嶸昔者  
山頭匹練直視吳門今也扶老携幼徯望

至尊九華明燭百和然薰綵旃錦幄載路填闐威顏咫尺清問下民顧蓋藏之實寡兮惟故俗之未新何風土之靡靡兮致

天語之諄諄留再日而後發兮沐千載之

殊恩由朱方次曲阿兮歷連岡與高原見舊京之城闕臨前代之陵園樵蕪往而不禁寢殿巋然獨存

天子曰咨有司之過緊元綱之既頽自匹夫而有天下不階成旅雜用王霸流澤既竭遷殷草夏弓劍猶藏灑

埽毋浣吉蠲為饒精意奠筭懿矣夫

至聖之純一而

至德之廣大也然後揚舫振柁還轅結軌問嶧山經泗  
水憩闕里修典祀想龍蹲兮如在識馬鬣兮於此溯圖  
書之亮章實孔繇之立制惟弘業之映暉歷元精而享  
契灑

奎藻之洋洋與卿雲而並麗儼對越乎兩楹加頒賜於  
四氏秩元公以嬋素王述明光而追統紀可以知先聖

後聖百世一揆者矣於是葭灰飛琯適當中冬千乘迴  
薄萬騎從容

法駕言旋起居

兩宮

臨軒穆穆

問寢雖雖爰申戒乎百司蠲疵癘以興庸省方之典既  
成痼瘼之恤靡窮已布德而徧德即康功與田功斯萬  
民之所以咸和而萬國之所以來同者乎敢作頌曰景

運四葉憲章時巡無射應候農隙是因踐履凋枯行葦  
之仁天以順動煦然皆春省成守課勞問農畝興言禹  
功率彼河濱江表望幸往恤其民嵯嵯日觀觸石出雲  
英雄逐鹿聖哲獲麟昭答靈貺薦裸享禋錫我福極協  
於神人皇矣天保

恭已撫辰不敢暇逸出為民勤陋彼封禪七十二君





長白山賦

吳兆騫

猗茲山之峻極眇羣峰而獨尊秉青陽以出震標皓靈  
而燭坤揭龍鄉而作鎮頻鵬溟以為門參二儀兮永峙  
屹九成兮莫倫徒觀其大勢也則截薛巒峯窰窪塘峽  
窈邈嶙峋壇漫莽冱迴漠漠以橫被崛嶢嶢而極上岨  
遼甸啜朔孺輶挹婁瞰朝鮮亘喬基於千里造曾椒於  
九天赫兮寡仇峭兮迴拔嶺輪糾以爭互巖歸嶷而相  
峴峰千仞兮縹曜壁萬尋兮瓊潔鬱騁險兮千霄詵負

高兮帶霓洵東極之神隲詎西崑之可埒爾乃循覽四  
麓攷其周綴爰有蒼松巨林猷蔓黝邃壯天有極橫地  
靡際既貽坂而連延亦籠岡而摧隤根欂佹以鱗羅葉  
綫獵而羽翳擎莖含飈以鬱蓊攢柯冒霧而叢倚霄兮  
沉沉霽兮旣旣歛陰火於空心感陽波於槎枿乍頓道  
而歌卧忽摧壑而側植信亥步之未跡知禹桀之莫暨  
於是黛凝複嶂烟暝虛嵐森梢陳互埽塹嶺崑景晦時  
兮罕曜塗塗湫兮增湍巾曾陰於遙嶽髣荒徑於修巖

杳恍罔兮晝含暮  
儵寥窈兮夏凝寒  
其中乃有黑鵬青  
鷄蒼鷹素鵲皎鵠  
碧鷄迅鷲俊鴻風  
騰猛腦霜披勁翮  
呀吭軻輶奮翰  
擗或命儔於杪顛  
或結巢於枝格隣  
金眸兮高睇厲青  
散兮下擊緇朱翠  
輝殊材票質喧聒  
相驚淦躍自鷺鼓  
背距以增響翫羽  
毛而成積極翔羣  
之詭錯咸沸卉而  
斯集若夫赳虬之  
儔昆駘之屬伏赳  
長嘯豪豨奔觸麇  
麇昏於積岨熊虎  
睽瞞於叢木豺  
獫斷斷以猛噬  
縱斨驚透而紛逐  
般首勁角園題從  
目

昏嗥晨响風馳雷蹴慄林振壑殷巖駭谷至乃青鸞黃

鼬華貂文豹挺修毫之溫潤含雕采之煒烈豆目賜睽

麥髯狎獵棲跡堅冰冒蹤盛雪竄木末而騰越穴巖窺

而競捷羌托體於寒隙疇効修於華闕伊寄類之夥够

嗟難得而殫說爾廼林徑欲窮近蹊半墳轉千盤而漸

高出九折而逾礙紆寒產竦嶒崿修渚響湍瀨縈濯

龍之滄淵

濯龍  
治也

欲納鶯之雙派

大小  
鶯二河

殷雷地底倒景

天外駭河流之凌薄劃巖垆而澎湃棧鬱盤於迴溪路

屈屨於巉峴澗凝空兮誰涉崖踐虛兮儼對於是豁開  
直裂嵒嶸如憑抗術阡於鳥際超軌躅於雲層邈半漢  
以上躋軼隆巔而究升周步山極肆目巖陁曠若砥原  
坦若廣庭纖條不疎卑枝罕莖寒蕪莽莽石道冥冥何  
增峻外峙而唐壇內平爾乃羣巒結瑤以峻起千巖削  
玉以攢立頽砭含皓以堦垣崕崕繚素而叢集遙五石  
以相煥環百里而周竅類瑤臺之偃蹇宛瓊山之削方  
仰重霄兮可捫俯下方兮無極互陰晴於膚寸攬星辰

於盈尺伏岑寂而返眺訝雷雨之下黑爰有十年之冰  
太始之雪嵌空峭竄并凌摩岳六尺皚皚衰文嶭嶭迎  
素秋而競飛涉朱炎而自冽嶰壑森淒以月鑒峽嶠炯  
晃而鏡徹乍消長於新故疇殫究其融結紛銜耀兮遠  
映何吹律兮可熟爾其混同之本鴨綠之源衍為神池  
以宅乎其間曾瀾廣濶靈液淪連振以曲碕之巉崿繚  
以襄岸之駢田含靚如拭積明若空乍風披以瀲灩條  
霞蒸而潰泚鑿翠啟鱸湍之徑躡雲構蛟人之宮爾乃

疏隘匱穴隘砦跳潛沫駭奔淥汨噴阿而瀉瀑雪砮巖  
而瀕浴徂南驟北趨浥聚硤涓靈源於千頃淪神委於  
二江若其堪竇之所潛演穹廡之所復激淮似碓投洞  
若機疾並騰傾而灑珠遂奔揚而綴壁羣流既滌四派  
廼馳瀉瀉崇岑喧厓峻岐颯沓雨集漱洌烟霏挂流曾  
碧之表淪波空翠之隈倒銀潢而半瀉矯皓蜺而迴飛  
於是澹汙安翔蜃蠃四會漾漾混濤流流振瀨抑魚龍  
之餘怒集大抵而為滙澗兮永指晶兮徐邁出乎松花



之限注乎烏龍之外所以宣天網之含布壯朔野之襟  
帶若攷其瓌奇之所窟宅珍瑋之所景彰則夜珠流照  
於素波頰玉攄采於青岡人蔓抗莖於檄陰良楮挺竒  
於松陽靈蛟驟螭而容與羽人撫鶴而棲翔畢山經以  
撰異莫茲岳之靈長至其出納望曦懷吐雲霧苞陰陽  
以靈秘通玄漠而神護小衆山於陟敦渺七表於指顧  
嶇嶇則千市未殫縹素則萬重紛聚頓挺拔之地軸俛  
嗟峩之天柱故能上當辰曜仰福

帝居抗基卓犖翔勢扶輿踞蒼門而表神宅並青岱而  
闢仙閭施彤雲之晝聚焯紫氣之晨敷孕造夏之玉宇  
識臨代之寶符啟式廓於

祖烈增景鑠於

皇圖藏瑤牒兮可迭涌金精兮詎誣瑞我  
清兮億載永作固兮不渝

皇清文穎卷四十一

欽定四庫全書薈要卷一萬九千四百四十三

集部

皇清文頴卷四十二

賦

有事於

南郊賦

有序

韓 炎

皇帝即位十有二載

天休浥至治化既洽夙夜祇畏不皇康寧勤民奉

天百度庀飭祀事孔明必敬必時冬十有一月日長至

以其日有事于

南郊禮也先是

詔禮臣集議致祭所宜辰及齋戒處所禮臣以周人祭  
日以朝及闇及歷代齋於別殿之禮以請

詔可先期有三日

皇帝齋於別殿凝精澹慮穆若天通戒百官有司於其  
署宿散秩金水橋禮臣治祀事皆豫及期未明

皇帝出宮百官皆從大臣陪位掌次導至壇案臨皇邸

有司親事益虔暨厥明升柴告

天禮秩備舉既卒事越翼日

皇帝朝

兩宮還御

太和殿羣臣畢賀則禮美而文志敬以和神明之感通  
上下之交泰迎

天祐協庶徵具此時也臣莢暨儒次羣臣後伏覩

皇上恭

天成命著存

先烈恪盡於禮本

天本

祖之義實萬於昔之展采錯事者豈以國之常典曠而  
不書顧既已備諸史氏恐猶未鋪揚極慮為後世  
觀輒不自量搜竭愚億述而賦之其詞曰

於皇維

清

列聖相繼底定四方以櫛以薙五十餘載內外罔一不  
諛庶績咸秩靡大與細禮備樂和風移若振凌殷鑠周  
曾不芥蒂固已膺皇矣之眷顧奠萬年之統系揚配  
天之弘庥薦告功德之顯懿者矣肆維吾

皇嗣服無疆日監於命之不易神饗之弗克有常視聽  
惟民日寧而親之弗敢怠遑立政以簡選賢無方典學  
維勤緝熙用光爰除秕莠以起羸疴以產以假或擎而  
藏仁覆如天厥德孔明帝其用嘉祚以降康不盟而孚



時克用享於維仲冬律應黃鍾貞元相嬪橐籥無窮烟  
煴權輿昭報維崇禮迎長至以達

昊穹

皇上乃先時而戒事集禮官而折衷吉蠲何所辰良何  
從既酌陰陽而定朝闇復即別殿而擬齋宮是時猶未  
底夫郊祀也游心儲精無垠無極淵蛭蠖獲孔靜幽墨  
七日三日散致神明之德施薜荔以為席兮卻紅鸞之  
重疊曠碧綃以為幃兮屏寶帳之甲乙盛顏失其清虛

曼聲辭其感栗奚蟬翼而翠珍將蘓黃而茹白獨沆瀣  
之精英與清音之噲吸洞洞乎肅肅乎禮神之圓頌祇  
之室有聞乎其聲若接乎其色百官以次聽庫門之戒  
受澤宮之敕往慎乃司各虔厥職爾乃元籥氣應葭管  
灰飛香草初榮水泉俄滋惟冬實中惟子是孳雜人傳  
警夜如何其

天子乃叶靈辰命鑾輿登翠鳳翳華芝六素蚪四蒼螭  
靡奔星之旃翻明月之旗伏鈎陳以翼衛召顏倫以驅

馳揮蚩尤以秉威趣王良以屬車馴天狼以彊弧捎夔  
魑而低垂摧靡縈綬綵絳旂旒翕赫慘纒駢應陸離之  
金波之穆穆襲玉露之霏霏肅靈壇而蒞止惟敬將於  
天威質明乃薦圭璧延祝嘏升玉牲酌翠斚奏雲門舞  
大夏誅蕩蕩神之來風習習神之下儼裴回神之右忽  
焱逝神之左神之留光逐星神之馳蕭若馬既乃芳薪  
上徹病腎肅光東燭滄海西照扶桑南曜丹崖北熠大  
荒於時

帝心饗答肩然式憑仙雲五色旭日重輪和風龕集協  
氣歌蒸維

三后之在天軼下武而並配乃孝思之維則允神孫之  
克對坐紺席以居歆嚴祖帷而警欬寂玉衣其翻飛慰  
大風之慷慨洗鐵嶺之風烟湧珠河之流抹枯泉注其  
香潔芳草忽其夢對姚鄉之葢旋浮原寢之珠重墜既  
禮虔而告成肆玉軼而旋反紫烟縈葢而霏微羣靈扈  
蹕而蜺蜺磻雷鼓兮駢闐眇天樂兮遠近博臨行淡乎

下房景光彌燭乎長阪膺百福之穰穰敬展謁於

兩宮涓詰朝而進觴祝

聖母兮恒嵩告大慶於履長媿孝養於南風上食則進  
靈爪於絳寶獻壽則添長線於女紅乃御

太極而受朝集車書之大同於時間平諸王邨霍宗室  
通侯小侯天捐時捐或進羔鴈或奉珪璧肅肅習習各  
以其秩期門羽林飲飛執戟控柙設衛弋楯夾立勇踰  
貔虎旗拂雲墨樅樅裔裔各以其色四方計吏二公牧

伯來自屏藩獻贄天闕巍巍栗栗各以其績雕題鑿齒  
烏皮黃弋丈夫女子左言侮食來享來王不維不繫紛  
紛籍籍各自其國禮儀既備仙樂斯徹遠陋秦儀近邁  
漢絕長跪者三應山中萬歲之聲叩頭以九赴虞廷簫  
韶之節緬神貺嘉答其若彼洎羣情忤舞其如此莫萬  
邦燕谷之溫熙百姓春臺之始豫元正兮太和布天下  
兮大喜寧獨示一人之慶私奉郊之縣而已於是懷鉛  
握槩之臣簪筆持橐之士眩耀暉光味飫嘉旨偉盛德

盪盪其寡傳竭愚瞽眊之微指旅進而稱曰

陛下紹五三之逸緒綿億萬之大業孝弟昭格於神明王  
享咸來乎有截陋赤熛靈威之非經哂玉女仙人之尤悖  
謝郊時之煩興斥謳巫之相接絃五十息其悲思樓十二  
失其爰業五星之次如珠斯編八神之樹測晷斯協咸  
願歌功鏤德不啻於書雲鋪張揚厲比伎於獻韞蓋際  
乎時之盛而忘其詞之拙也

天子乃穆然而思曰吁朕其可以或泰惟

天其眷我

祖考之洪烈顯德尚克相予予其庶幾蒙賚予夙夜祇  
懼罔或不戒於盤盥罔攸敢弛於衽褱予熟復古訓窮  
討制作調元氣於相樞開治化之留昧七日之復用是  
觀心初九之乾敢不若厲於是屏煩營飭齋精謹陽生  
審謙盈肅明明歸

乾清





# 南苑賦

王鴻緒

猗燕畿之雄服據九土之輿區直尾箕而畫野控渤海  
以定都侯綏仰止而和會

聖人御焉而膺圖爰有南海鬱鬱國陽帶以灤易濔衛  
之水襟以玉泉翠微之岡繞以薊丘督亢之饒沃重以  
千秋勝國之遺疆其外則鉅總藁秸稱三輔之腴土焉  
聚落碁置列灌絳之別墅焉原隰鱗次編羽林之園囿  
焉繚以長垣構以崇墉塗以西蜀之丹潤以赤堇之銅

象營室之絕乎天漢似天田之屬乎紫宮遠而望之爍  
乎如初升之璧月爛兮如春霽之修虹其內則廣臯狹  
畦直塗曲畛千頃鱗鱗羣動蠢蠢鬱鬱嘉木之披離挺喬  
柯之輪囷戕修阜之逶迤歷窪谷之蔽隱儼重扃之軒  
豁羅奇珍而淵蘊其水則陂高粱之流液涵素波而瀕  
洞待太液之遊鵲婉樂池之集鳳浪雲浮錦波霞浸凍  
冰泉凝沍玉濤迴動中則紫茱綠穉碧蒲翠萍澤芝玉  
蕊雞頭紫莖田田似蓋齒齒若鯨文魚媵婢珠蛤含星

上則鳬鷺春舞鴛鴦晴宿虞蓼披紅芙蓉垂綠其樹則  
有長生交讓連理合歡靈松菌桂神梓木蘭絳桃素柰  
青櫟紫檀夏侯之所賦嵇含之所歎漢帝之所移植魏  
王之所遊觀莫不菁蔥鱗耀樛結蚪蟠其草則有杜若  
卷施縹蘭紫葳慎火離離迷迭穉穉或潤露而朝陽或  
迎風而藉地其鳥獸則有蒼鶴千歲文翬五色鵝鵲唼  
乎靈沼孔雀貢於南域濯濯白銀之窟龐然黃金之鹿  
鷹隼之所摧搏獫狁之所騰逐珍禽奇獸或充牣而擾

畜山虞不能錄其名獸人不能殫其族於是層樓蔚起  
柘館參差龍輦耀日鳳栢侵霓周廬交列帷幕密施宮  
則明光建章之制殿則九成興慶之規凌瑤光而捫太  
乙橫赤道而掩黃旗蓋六龍巡幸之暇而爰居爰處者  
實在乎斯若夫景暄妍兮有曜風習習兮自南鳥覲  
皖兮和轉林陰鬱而銑銑觀芳辰其韶淑景河洛之美談  
寫

宸情兮懌豫命龍駕而戒鸞駟爾乃建翡翠之旌鳴靈

鼙之鼓繕招搖而指河魁面朱雀而背元武容容與與  
千乘萬騎而戾乎其所乃

命八校之長七萃之士騁渠黃騰駮耳張越棘釋盧矢  
激素鷗弋白雉一發兼縱三驅殪兕覈命中之上下而  
課其能否既而室弓服羽軍事攸畢神武邁皇山海寧  
一羣臣於是蹌蹌躋躋而上萬年之觴陳軀劉之禮歌  
吉日之章召揚雄於甘泉命司馬於長楊賡武功以文  
德易肅殺而惠以吉康益其冬狩夏苗以儆軍實而非

以遊翺也春巡秋省以物土宜而非以驅騁也陰殺陽  
生以若時紀而非以軼情也獻賦歌詩以貢太平而非  
以教嬉也猗歟皇哉並西陸之靈臺駕東京之甫草陋  
漢后之遊汾樂姬宗之在鎬故能使七澤遜其勝九藪  
讓其奇華林芳樂媿其德楚賓齊客失其詞惟

鴻恩之翔洽畀萬族以熙熙爰合符於軒處遂垂拱而  
治之

西山賦

顧祖榮

維

神京之鼎峙，聳碧嶂於西隅。接太行而綿亘，拱紫禁而環趨。峯迴川抱，雲密烟疎。既春華之若錦，亦秋實之如珠。境以幽而林靜，地以曠而天虛。瞻茲山之秀色，實平臯之畫圖。爾其石逕迢迢，溪流曲曲。碧雲之寺，則絕壁盤空。香山之臺，則奇峯削玉。來青之雲氣，常留松盤之嵐光。新沐裂泉之潭影，臨虛卧佛之泉聲。相逐呂洞之



奇石璘璘石景之嶄巖簇簇平波閭畔暗茂樹以當窻  
秘魔厓前冠雲峯而架屋或盤曲磴於林端或敞琳宮  
於平麓響鐘磬兮隨長風晃金碧兮迎朝旭其山之為  
狀也欽竒竦削曲互崇隆丹青插漢蒼翠浮空峯腰雲  
蔽石色苔封直如挺笏橫若游龍草織地而鋪纈柯穿  
澗而飛虹削芙蓉於天半秀螺髻於雲中其水則湍激  
空明玉泉成沼浦散青萍洲垂紅蓼嫩綠引而苻葉方  
長殘紅謝而荷香欲老繞幽谷而潺湲注平湖而浩渺

浮遊魚於鏡中掛飛泉於樹杪朝移漁艇若槎客之泛  
銀河夜照螢光若繁星之垂瓊島至於時當春夏灌木  
蔥蘢繁花擢秀老幹凌空霞映水而成綺雲出岫而藏  
峯碧粘天而無際翠貼地而焉窮芳草發兮山路仄繁  
英落兮溪流紅送禽聲之高下兮晨風裊裊含風影之  
氤氲兮春雨濛濛又若時屆秋冬景物澄澈木落峯明  
天空露白林翳山而丹染石凝寒而冰結葉蕭蕭兮影  
疎虫淒淒兮聲咽萬疊陰雲千峯飛雪渺滄海之驚濤

混長空之一色隨四時以改觀歎茲山之寬絕緬巨靈  
之開鑿偉造物之孕奇三山隔於弱水五嶽奠夫坤維  
或峻極則攀籐力弱或幽遠則策杖難窺孰若茲山之  
效靈獨拱衛於

京洛快覽眺之非遙實登臨之足樂敢濡墨而含毫效  
天台於孫綽

芍藥賦

顧祖榮

青陽弛令離火乘權繁紅銷影新綠闌妍花事過荼蘼  
以後風信到芍藥之前於時紫陌塵輕翠郊雨過連塍  
接壠分籬別路目迷五色香成百和遠而望之郁郁紛  
紛濃如錦綺淺如爛銀碎如剪綃厚如疊茵如火如荼  
如比如鄰彷彿兮朱草金芝燦爛兮景星慶雲近而接  
之或分或聚或火齊之堆盤或金莖之承露或霓裳起  
舞臉脂之雪微飄或綠葉爭扶翡翠之風自護非一狀

之可名亦鏤心而難賦是時也則有侍臣休沐上客開筵酒徒挈榼詞人劈牋香車繹絡驕馬聯翩日欲落而未落遊將旋而難旋三枝兩枝插帽沙際水際迴鞭爾乃壓擔盈車辭根入市或融蠟而封蒂或連泥而剩蕊或槩几之作供或瑤堦之位置初來則價重朱門漸出則香殘野寺此固春色之最奢奇葩之居殿者也考之往古偏靳濡毫咏黃花於晚節譜香草於離騷即舒李文成共數牡丹之名種歐陽品就亦推洛邑之奇葩何

將離之佳卉乃棄等於鴻毛豈知載在風詩嘉名最古  
羣芳可冠小草莫伍況夫托根

帝里儼上苑之芳菲得氣栽培沐九天之雨露宜其名  
譜之所採錄凡卉之所却顧者乎



鄧尉梅花賦 有序

彭定求

姑蘇西山梅花勝處鄧尉為最近自

鑾馭南巡臨幸茲山被

聖澤之鴻龐沐

天章之藻耀益令香林濯彩芳卉晞榮臣式聽輿歌謹

為小賦

維青陽之毓粹見玉樹之含芳風臺橫繞月觀輕颺一枝  
兮春暉早逗幾樹兮凡卉莫當靡不攄遠韻挹清光



孰與夫千巖搖曳萬谷迴翔離離乎如遊衆香之窟霏  
霏乎如探羣玉之藏吳會江鄉姑胥山郭縹緲煙巒青  
蔥林壑過石鼓之嶙峋接銅嶺之磅礴波間明鏡空澄  
橋畔彩虹雙落迤邐崇岡差峩傑閣歷鄧尉之周遭梅  
英遍於叢薄爾乃韶光乍起暖律初回南枝潛發東風  
暗催則有連村盈塢漫嶺延隈璫姿交映仙蕾爭開深  
雪扃寒姑射之神忽降橫參耿耿碧霓裳之舞爭來蓋地  
本膏腴花宜林麓繁植同千畝之禾叢生倍萬竿之竹

先杏蕊以舒榮掩蘭皋而蘊馥攬勝萬峯之巔眺遠太湖之曲漁洋疊嶂晨迷烏鉢層嵐曉沐凝素練之盈波訝白雲之滿谷若其皓容倚月冷蘂當風欲霽而明暉千丈其雨則暗霧萬重繞屋而枝枝連卷嵌石而樹樹摩空磴道窈折澗戶潛通氤氲百和之香真是娑羅樹下汗漫恒沙之數非惟薝蔔林中是以精藍遞興化城作供霽旭融和流澌解凍騷人攀樹而神怡烟客投林而色動聞笛裏之孤吹和琴中之三弄何殊官閣之珍

不減羅浮之夢然而冰霜淅瀝山澤清癯非同上林之  
植誰邀

帝澤之敷縱輪囷於林谷止飄落於江湖何幸蒼龍夙  
駕翠葆前驅爰訪空峯之蹟方探河洛之圖遂令山靈  
延佇品彙昭蘓樵牧騰歌齊聞華祝鼓鐘鳴豫競說嵩  
呼迓

天顏於芳樹邀

睿賞於仙跼信負心其有托知皓質之不孤於是

御座雲凝

奎章日麗珠離玉綴羣疑閬苑之遊柏影松聲尚想勾  
陳之衛疊巘龍盤飛泉鶴唳鼎盈三寶之資枝獻萬年  
之瑞緬懷景物恬熙默企

聖心仁知山中踏雪奚誇金谷之榮樹下咏花還作隴  
頭之寄



宸翰天章賦

有序

胡會思

臣聞日星絢采咸瞻法象之垂河洛升禎肇啟苞  
符之秘聖人乃章為經緯斯世用迪夫昭明建極  
敷言則萬禩循夫彛則觀文造契亦四表沐夫光  
華蓋哲皇發越之精英皆造化同流之元氣也恭  
遇我

皇上睿握義圖神澄軒鏡泰階叶兆盛德睹其日新離  
照當陽多藝由於天縱合帝皇王而負運五位攸

崇統天地人以綏猷三才首出顧乃萬幾在御黼  
筵不輟夫牙籤乙夜懋勤寶墨時霏於玉檢殷盤  
禹鼎發金匱以流徽岫嶠岐陽較銀鈎而集美  
宸章煥發

天藻時頒雲漢流暉既宣四庫七畧之奧奎園叶象復  
究三蒼八體之源皇哉振古之鴻文偉矣無前之  
聖則也小臣久廁詞苑夙侍

起居親瞻

雲日之輝莫罄管蠡之測謹頌揚盛美而獻賦曰  
猗

聖皇之凝命當人文之化成賡

廟堂之喜起際海宇之昇平允教訖而恩洽洵禮備而  
樂明奎壁布其躔曜河嶽羅其精英法乾符之得一含  
協氣於穆清乃輝光之下燭森萬象其畢呈洪惟

聖學精深

皇衷睿哲曠識天開英詞颺發接道脉於勲華蘊文思



於義頡博綜圖籍以無遺挹注江海而不竭是以機務  
之暇覃精文翰黼藻紛披龍章絢爛碧落昭融卿雲糾  
縵小臣愚魯未足以窺所撰也仰觀

寶畫之昭垂固已莫知所讚歎矣聖兮神兮筦天鈞兮  
煒兮煌兮倬天章兮譬上蟠而成象亦下際而呈形何  
鳳翥鸞騫之足喻匪龍跳虎卧之能評運神明於體製  
集書學之大成波磔雄兮金鐵屈兮斧鑿化兮真宰驚於  
時宮硯沉碧山鑪泛清瑤管抽兮春葩麗金壺漬兮瑞

露凝遊淵悟兮入渾穆灑神翰兮暢

皇情竊覩夫表章六經闡發列史剖千聖之奧藏一萬  
古之聽視揭日月兮提弘綱析微茫兮抽秘旨煥乎鐘  
鼎長垂郁乎球圖並美神動天隨雲蒸霞蔚皆精一之  
心傳詎鉛槧之能擬洎夫崇儒重道宣教明彛神山  
聖域繡榜豐碑燭星垣而振耀鐫琬琰以流徽以至研  
歷數之精微訂鐘呂之謠謬甘石所不能窺夔龍所未  
及究經

元后之亶聰迪羣蒙而啟牖皆乾文之發舒駕百王以  
馳驟乃若寓

奎章於麗賦發

睿詠於瑤箋金聲玉振璧合珠聯韻叶儀庭之紫鳳辭  
高解愠之薰絃

翠輦時巡遠邁橫汾之作紫宸端拱時揮復旦之篇莫  
不鏗錡韶濩歎薄雲烟元音奏而和風應律麗則敷而  
霽旭呈鮮臣工拜賜而榮渥靡弗蹈舞於堯天繄

聖製之喬皇蕪

御書之精妙理無隱而不宣法無微而不到真足冠丘  
墳跨典誥掩五緯耀二曜是以榮光奕奕德音秩秩銀  
繩啟而草木敷榮翠軸展而河山潤色諦觀虞夏以還  
歷數漢唐誼辟雖復逸思雕華清才迅發卓爍乎詞章  
研精於翰墨又烏足以仰厥清光而臻斯極則者哉是  
以東際扶桑西盡昧谷南橫炎海之表北踰祝栗之族  
被

聖人之文教觀光華而沐浴盡一道以同風遂無思而  
不服是雖日侍琅函時親玉局固未能測至道之根源  
而窺

天心之所蘊蓄者也乃再拜稽首而系之曰濬哲惟

皇發神秘兮披文相質衆美備兮偃波垂露會寶意兮  
體含飛動協符瑞兮摘掇菁華攄淵懿兮永勒丹笥垂  
綠筭兮教化笙鏞振大地兮光昭於天被萬類兮

萬壽無疆賦

彭會淇

維天心之純佑兮爰篤生夫我

皇亶聰明以首出兮綿歷服於無疆乘常新之離照兮  
體不息之乾綱信久道之化成分閱五紀而彌昌當大  
衍之全策兮符皇極之中央居青陽之右个兮迴鑾馭  
於東方屬春和之普暢兮迎麗景之舒長日扶輪而耀  
彩兮風拂旆而悠颺川嶽貢其珍符兮雲物紀其嘉祥  
草木效其華滋兮鳥獸獻其文章矧含生而負性兮靈

萬物而近光羣飲和而食德兮能不忤舞而趨蹌則有  
天潢華胄宗盟懿親鳳毛翩翩麟趾振振彤襜翠幄碧  
幃朱輪金羈玉勒繡韉錦茵貴剖桐封之瑞榮敷花萼  
之春繁弱密須屢分天物鳬鷺行葦時醉犧樽聽雞鳴  
而趨長樂隨龍輅而朝

寢門挹霞觴之漱灑斟瓊液之氤氲齊班行而上壽樂  
笑語之繽紛亦有元凱名家伊巫望族豐沛馳驅幽岐  
梯沐十葉貂蟬一門華轂爵承世秩之庸俸仰天庾之

祿姻連

帝室似蘿葛之依松職侍

禁廷儼繁星之麗旭榮施祖父之勲勞庇及子孫之齒  
錄身依日月思高厚而知慚運際風雲望龍光而敬祝  
若夫通籍官寮登朝撫仕周室六卿漢家羣吏委珮蹌  
蹌彈冠濟濟或黃髮而備公孤或方剛而膺任使或登  
槐棘之班或受封疆之寄或分職於巖廊或效能於都  
鄙秩有崇卑情無遐邇享鼎烹之奉固切懷忠叨升斗



之精亦圖報禮幸

聖節之方臨識

天顏之有喜葵思向日敢忘愛戴之忱管欲窺天莫罄  
揄揚之美若乃辟雍士子膠庠生徒鴻都詞客虎觀通  
儒衣猶縫掖座接簪裾席珍待聘被褐懷瑜觀光而遊  
上國挾策而赴京都望清塵而獻賦擁輦道而陳書懷  
樂育之仁夙知忠孝仰文明之化倍切歌歆聯袂褰裳  
首四民而踴躍擔簦負笈輕千里而翹趨銀甕移來鏤

出萬壽之字芝函捧去裝成五嶽之圖至若村夫巷豎  
白叟黃童江湖賈客里井耕農生依闌闌跡逐西東巖  
栖谷汲夜宿朝餐忘

帝力於何有瞻

天表而無從咸欣在宥永荷帡幪樂春臺之皞皞愛壽  
域之融融指長安於日下識紫氣於雲中莫不塵飛增  
嶽草偃從風環區稱慶比戶呼嵩繫含哺而鼓腹擬頌  
禱於華封別有異域冠裳殊方幅舄鑿齒雕題洞胸刺

額衣毛茹血之倫穴處巢居之國亦皆望氣歸誠聞風  
奉職庭設九賓道通重譯大一統之車書會萬方之玉  
帛獻琛貢雉慶

寶歷之悠長航海梯山凜

天威之咫尺信中外之同心合天人而交格蓋由仁周  
六寓誰忘覆載之恩澤被八荒肯負生成之德岡陵之  
願不介而孚芹曝之私經時彌積敷天喜氣即是祥烟  
瑞霧之籠蔥匝地歡聲不啻琅玕雲璈之考擊豈若歲

星金馬十洲勞武帝之求王母瑤池八駿騁穆王之跡  
者哉頌曰春日暉兮淑景明和風扇兮海宇清天垂象  
兮地效靈含譽垂芒兮耀玉衡沆瀣為漿兮滴金莖躋  
公堂稱兕觥願吾

皇兮常康寧億萬載兮樂太平重曰穆穆我

皇承休命兮垂裳四紀天保定兮萬幾時勅三辰正兮  
百度維負八方靖兮臣民戴德騰歌詠兮欣逢

聖節朝野相慶兮誕受多福日新而月盛兮吾

皇之壽並天地而無竟兮

浙江潮賦

沈三曾

惟太極之端倪肇一元之翕闢天得氣而循環水隨天  
而潮汐陽舒而為日精陰歛而為月魄惟日往而月來  
應靈潮之出入觀其俯陽燧而抽光臨方諸而吐液魚  
腦準其盈虧蚌胎資其潤澤驗物理於自然豈一氣之  
偏隅考冰池焦釜之論搜海志山經之輯徒驚化鯤之  
濤孰覩斷鰲之極王充舐筆而多遺盧肇和鉛而莫識  
爾其至神也震不測以為靈至信也秉不爽以為德方

氣升而地沉固乘時而洋溢暨氣降而地浮亦應期而不失當卯酉之日則陰陽之交也氣以交而盛故潮之大也勢以鼓而彌勁當朔望之後則陰陽之壯也氣以壯而升故潮之至也機以激而愈騰應乎乾則天一之所生效乎坤則地六之所成習乎坎故游至而不爭說乎兌故得秋而自盈然而邗溝未覩瓊海莫經百盈百涸曾傳漏洩三溢三竭但述安寧要不若錢塘之閱覽足懾魄而移情爰考錢塘之為江也遠接瀛壖遙通碧

落東島嶼之滌洄互扶輿之磅礴赴天目之蜿蜒緯富  
春之繹絡扼婺歙之咽喉襟宣饒之根角上流披嚴子  
之裘旁邑採銅君之藥名傳越絕之書地控勾吳之索  
樟亭四望面面崢嶸龕赭兩山朝朝激搏燦玉礫之光  
明曝銀砂之閃爍滙窟宅于龍螭壯盤渦于鮫鰐故其  
包含品物釀郁菁英珊瑚明月紫貝瑤瑛丹虬采介神  
鯉華鯨殊形詭體萬彙千名固編蒲之所不能載亦然  
犀之所不能明惟夫天吳先導海若駿奔龍伯起舞蛟



宮欲吞狂雷隱隱噴雪紛紛走百里于瞬息飛一線于  
海門遠而望之乍如玉虹之橫銀漢徐而竦之颺如鐵  
騎之驟中原朗朗乎排瑤圃開瓊岑洞靈合沓幢節蕭  
森駕閶風之縹緲驅員嶠而來臨娟娟乎如馳玉女揚  
素娥明珠翠羽皓齒修蛾見生塵之羅襪悵微步于凌  
波浩浩乎如長矛利戟鞭弭橐鞬貔貅萬幘組練千屯  
厲前茅與後勁儼玉帳于龍幃隆隆兮如洪鐘疾撞大  
呂爭鳴聞韶魯國張樂洞庭總八音之並舉肆憂玉而

縱金但見砰磕奔騰激揚浩蕩挾鯁壑以俱來貫牛斗  
而直上跳沫則重城欲浮驚湍則衆峯皆讓波撼石而  
吸三靈勢極天而浴萬象勇士見而嘖嘖猛將立而恟  
怵擊電轟霆之下笑人語之不聞排山倒海之前喜輕  
舟之無恙徒觀其水力之所到蓋不知其幾千萬丈于  
是乎起子迄午叻景納光尹公叱而地吼陽侯怒而風  
狂素鎧當前識靈胥之旗影銀花鎮後疑霸佐之鋒鉞  
維錢王之萬弩獨犀利而莫當射濤頭使東向迺築堤

而捍塘儼天門與碣石峙汪瀾之隄防紹禹功于千載  
共山高而水長乃有弄潮之夫迎潮之子舴艋飄搖鳧  
鷗容與蔡襄戒而不應馮夷見而竊喜疑木心與石腸  
習騎鯨與跨鯉更有寶馬千羣鈿車十里集江滸而來  
觀列茶棚與酒市簾窺吳嶺之青座對越山之紫指雪  
浪而笑語喧望銀濤而闌干倚乍日暮以歸城覓遺香  
于墮珥此觀潮者之勝槩也亦以見潮之神奇而莫比  
要而言之方其噫氣交作蜃勢憑陵日月浮動山川鬱

蒸足以增壯夫之氣而振俠客之膺泊乎駭浪就平洪  
波舍次曠天宇之澄清靜江花與岸並亦足以使躁人  
怡情而貪夫知止是其消息參乎四氣進退運乎六時  
滿而能抑謙為之持動而不括靜立其基淵凝澄徹往  
復張弛久矣斟酌元氣而為萬物之滋矣況乎

六飛時御萬乘前驅南巡越甸東瞰吳趨表章功德混  
一車書河清海晏雲行雨濡澤溉扶桑之國恩流若木  
之墟軼陶唐之刻玉邁為汭之披圖小臣登瀛忝竊學

海徒虛矢濟川于說命慚作楫于商書論水羨莊蒙之  
有識觀濤知枚乘之非誣幸生長乎澤國曾流覽于海  
隅極滄溟之偉觀之潘陸之陳敷敢臨池而染翰有望  
洋以踟躕

太液新荷賦

方韓

序維仲夏律中蕤賓薰風初拂時雨方新樹綠陰而冉冉水碧浪而粼粼乳燕穿花而上下遊魚唼藻而浮沉上林則蔥菁交蔭御堤則清迥無塵蓋天下之平久矣人物皆熙熙而自得卉木亦欣欣而向榮浩浩玉泉匯為太液斜繞宮牆遙連禁掖練光萬頃天宇一色平開曉鏡之晶熒靜映晴空之澄碧汎滄海于襟帶瀉銀河于几席環臺榭以滌洄漾蘊荷之的皪方其茆菡既植

菡萏初生田田剪翠片片雕瓊出淥波而霞照搖綺浪  
而雲蒸迴風蕩沫似弄珠之夜出映日澄鮮儼濯錦之  
晨興洗朝暉兮漱灑衰夕露兮清冷晴與雨兮俱滌華  
並葉兮齊馨芳香可贈咏菱江之初月方舟共採結錦  
纜于長汀但見晴鳬出浴纖鱗吹萍神龜遊于葉上文  
鴛宿乎花陰感萬物之得所想茂育之生成今夫蓮曠  
然不滓淵然內泓根有節以自固莖中虛而不盈辭烟  
蘅兮澤畔振華藻兮蓬瀛葉著如規之目花稱君子之


名蓋以根植靈沼跡連梧岡浥

九重之湛露沐

聖人之波光宜其香薰水殿藻溢銀塘並金莖兮吐秀  
與芝草兮呈祥齊木禾為上瑞偕幽蘭為國香詎同夫  
折之葺袂褰以為裳羣薜蘿而為伍昧葵藿之傾陽也  
哉



皇清文穎卷四十二



總校官庶吉士臣張能照

校對官檢討臣王鍾健

膳錄監生臣葉椿